

Ri carta ri xutz'ibaj ri apóstol San Pablo cheque ri hermanos ri yec'o pa tinamit Roma

Ri Pablo nutz'om tzij

1 ¹Yin Pablo jun rusamajel ri Jesucristo. Ja ri Dios c'a ri xinoyon richin que xinoc apóstol. Rija' xinrucha' c'a richin que nintzijoj ri utzilij rutzij ri nc'amon-pe colonic.

²Ri Dios xusuj cheque ri rusamajela' ojer can que nuya-pe ri utzilij rutzij ri' ri nc'amon-pe colonic. Y ri rusamajela' ri' xquitz'ibaj-vi can ri xbij ri Dios. Xquitz'ibaj can chupan ri lok'olij ruvuj ri Dios. ³Y ri xbij ri Dios cheque ri rusamajela' ojer can, pari' vi c'a ri Ruc'ajol, y ri' ja ri Kajaf Jesucristo. Y tok ri Jesucristo xpu'u chere' chuvüch ri ruch'ulef, xoc vinük cachi'el roj, y rija' ruxquin-rumam c'a can ri rey ojer can ri David. ⁴Y tok xc'astij-pe chiquicojol ri caminaki', xk'alajin-vi que rija' Ruc'ajol ri Dios y lok'olij vi cachi'el ri Dios. Y xk'alajin chuka' que c'o ruchuk'a'. ⁵Y rija' xuya' ri utzilij sipanic ri nspaj-pe rija' pa kavi' quiq'uin ri ch'aka chic apóstoles y xbün cheke que xojoc apóstoles. Quiri' xbün cheke roma xrajo' que pa rubi' rija' nkatzijoj ri rutzij pa ronojel ruch'ulef. Rija' nrajo' c'a que conojel vinük nquitakej ta rija' y nquinimaj ta chuka' rutzij. ⁶Y ri Jesucristo xixroyoj rix chuka' richin xixoc richin rija'.

⁷Y ri carta re' chive rix hermanos ninbün-vi-e, ri rixc'o chiri' pa tinamit Roma. Ri Dios juis nyixrujo' y romari' xixroyoj richin xixoc ri nyixtzeklebej-vi rija'. Y ja ta c'a ri utzilij sipanic ri nspaj-pe ri Dios y ri uxlanan ri petenük riq'uin ri Katata' Dios y ri Ajaf Jesucristo nc'uje' pa tak ivánima chi'ivonojel.

Ri Pablo nrajo' c'a nbe chiquitz'etic ri hermanos yec'o pa tinamit Roma

⁸Nabey ninmatioxij chin ri Dios ivoma rix. Ninmatioxij chin roma ronojel ape' chin ri ruch'ulef ntzijos-vi que rix itaken-vi. Y xaxe c'a roma ri

Jesucristo tok nquitiquer nquimatioxin chin ri Dios. ⁹Y ri ka-Dios retaman-vi que chi jumul ninbün orar ivoma rix ri rixc'o chiri' pa tinamit Roma. Ri Dios, ri riq'uin ronojel vánima ninsamajij. Ri nintzijoj-vi yin ri utzilüj rutzij ri nch'o pari' ri Ruc'ajol. ¹⁰Y ninc'utuj chuka' chin ri Dios que nbün ta chuve que nquitiquer ta nquinapon iviq'uin, si quiri' nrajo' rija'. Q'uiy yan chic c'a tiempo njo'on que nquinapon ta iviq'uin. ¹¹Roma juis ninrayij nquibe ch'it'z'etic, y ninjo' nyixinto' richin que rix c'o ta más ri nivetamaj riq'uin ri Lok'olüj Espíritu, richin que más niya' ivánima riq'uin ri Dios. ¹²O más utz ninbij yin que nkato-ki', richin ncuker más kánima chikavüch roj. Rix nquinito' yin richin más ncuker vánima, y yin nyixinto' rix, richin que más ncuker ivánima rix chuka'. Quiri' nkabün roma kataken ri Jesucristo.

¹³Hermanos, yin ninjo' que rix nivetamaj, que q'uiy mul c'a yin nunucun que nquibe ta chila' iviq'uin, pero man yin ninbanun tuj yin benük. Ri ninrayij yin c'a que rix nivetamaj ta más riq'uin ri rutzij ri Dios, cachi'el nubanun yin quiq'uin ye q'uiy vinük ri xa man ye israelitas tuj chuka'. Y riq'uin ri' nic'uan ta utzilüj tak ic'aslen y nyixq'uiy chupan ri rutzij ri Dios y romari' ye q'uiy ch'aka chic nyetaken ri rutzij ri Dios ivoma rix chuka'. ¹⁴Nc'atzin-vi que yin nintzijoj ri rutzij ri Dios cheque ri vinük griegos y cheque ri man ye griegos tuj. Nc'atzin que nintzijoj cheque ri etamanela' y cheque chuka' ri man ye etamanela' tuj. ¹⁵Romari' yin ninjo' c'a nintzijoj ri utzilüj tzij richin colonic, chila' pa Roma ri itinamit rix.

Ri ruchuk'a' ri tzij richin colonic

¹⁶Yin man nquiq'uix tuj c'a nintzijoj ri utzilüj tzij richin colonic, roma ja utzilüj tzij re' ri uchuk'a' ri nucusaj ri Dios richin nyerucol ri nyetaken richin. Ri tzij c'a ri' nabey xtzijos chuka' cheque ri man ye israelitas tuj. ¹⁷Ri tzij richin colonic nuk'alajrisaj chikavüch achique rubanun ri Dios richin que man jun kamac nk'alajin chuvüch. Cachi'el ri nbij chupan ri rutzij ri Dios ri tz'iban can: Ri vinük ri choj chic quic'aslen, nc'uje-vi quic'aslen riq'uin ri Dios roma quiy'o'on cánima riq'uin. Quiri' nbij ri tz'iban can.

C'ayuf ri quic'aslen ri man quetaman tuj ruvüch ri Dios

¹⁸Ri Dios catanük royoval chiquij ri vinük ri man utz tuj quic'aslen chuvüch rija'. Roma riq'uin ri itzel quic'aslen ri vinük ri' quik'aton ri ketzij tijonic. Romari' ri Dios nuya-vi pe c'a ri castigo pa quivi'. ¹⁹Roma c'o ta ri xetiquer xquetamaj pari' ri Dios, roma ri Dios xuk'alajrisaj chiquivüch. ²⁰Ri Dios man tz'etetül tuj. Jac'a ri ruch'ulef y ri ch'aka chic ri xerübün, ye tz'etetül, y jari' ri nyek'alajrisan ri Dios chiquivüch. C'a pa rutz'uquic ri ruch'ulef quik'alajrisan-pe ri Dios. Nquik'alajrisaj chiquivüch que c'o Dios y que ri ruchuk'a' man nq'uis tuj. K'alüj vi que c'o Dios, romari' ri vinük ri' man nyetiquer tuj c'a nquibij: Roj man jun kamac roma man jun xbin cheke que c'o Dios. ²¹Roma chiquivüch c'a yec'o-vi ri nyek'alajrisan que

c'o Dios, xa jac'a rije' man quiyo'on tuj ruk'ij cachi'el c'uluman que nban, nixta man quimatioxin tuj chin, xa ja ri man jun cakalen ri nyequinucla' ye nacanük y c'unük pa k'eku'n ri cánima. ²²Nquibij que ye etamanela', y xa nk'alajin que man jun quetaman. ²³Roma man nquiya' tuj ruk'ij ri Dios ri man ncom tuj. Xa ja ri nyecom ri nquiya' quik'ij. Roma hasta ye quibanun quivachbül vinük, quivachbül ch'ipa', quivachbül cumütz y quivachbül ri chico caji' cakün. Y jari' ri nquiya' quik'ij.

²⁴Romari' ri Dios xeruya' can. Tiquic'uaj na c'a ri itzel c'aslen, roma ja vi ri' ri rurayibül ri cánima. Xc'o ruvi' ri itzel xquibanala'. Juis q'uixaj ri xquibanala' chicachibil qui'. ²⁵Xa xquijoj rubanic ri ketzij, roma man xquitzekebej tuj ri ketzij Dios y xquitzekebej ri man ye ketzij tuj. Man xquiya' tuj ruk'ij nixta man xquisamajij tuj ri Dios. Xa ja ri cosas ri ye rubanun rija', xa jari' ri xquiya' quik'ij y xquisamajij. Y ja ri Dios ri nc'atzin que nnimirsüs rubi' chi jumul. Quiri' vi.

²⁶Y roma quiri' nquibün, ri Dios xeruya' can. Que que'uc'u'ix na c'a roma ri itzel tak rayibül ri c'o pa tak cánima, ri juis q'uixaj q'uin. Roma yec'o ixoki' man ja tuj chic achi'a' ri xequijo', xa ixoki' yan chic ri xequijo' y xquic'uaj-qui' quiq'uin. ²⁷Y quiri' chuka' ri achi'a', yec'o ri man ja tuj chic ixoki' ri xequijo', xa achi'a' yan chic ri xequijo' y xquic'uaj-qui' quiq'uin. Juis itzel ri xquibanala', y xa man xeq'uix tuj, xquitorij-qui' chupan ri itzel ri nquirayij. Y ja yan c'a ri quich'acul xlo-e chin ri rutojic ri itzel bey ri xquic'uaj.

²⁸Rije' xquinuc que man jun nc'atzin-vi nquetamaj ruvüch ri Dios. Romari' ri Dios xeruya' can. Tiyojtuj na ri quinojibül y tiquibanala' na ri man c'uluman tuj. ²⁹Ruyon ri man choj tak nojibül tuj ri ye nojnük pa tak cánima. Roma ri achi'a' y ri ixoki' nquirayila-qui' richin nquibün quimac. Nquibanala' itzel cheque ri ch'aka. Chi jumul c'a nquirayij ri ruchajin ri jun chic. Q'uiy itzel nquirayij nquibün cheque ri ch'aka chic, juis itzel nquitz'et jun chic roma utz c'o. Nyecamsan. Nquibün oyoval. Nyebojoyin. Y xa nquimolala' tzij. Y nquitz'ucula' ruvi' ri nquitz'et y nquijül rubixic. ³⁰Xe tzij nquibün chiquij ch'aka chic y nyeyok'on. Nquitzelaj ri Dios. Nc'o ruvi' nquibanala' roma c'o nic' quik'ij. Juis nim cakün nquina'. Chi jumul nquinuc achique rubanic ri itzel ri ncajo' nquibün. Man nquitakej tuj quitzij ri quite-quitata'. ³¹Ye nacanük. Nquik'uj ri quitzij. Man nyequijo' tuj ri calc'ual nixta ri quite-quitata'. Man nquijoyovaj tuj quivüch ri ch'aka chic y man nyequicuy tuj mac. ³²Rije' quetaman que ri Dios rubin, que ri nyebanun itzel cachi'el ri' nc'atzinej que nka-ka ri camic pa quivi'. Pero stape' (aunque) quetaman, nquibün-vi ronojel ri cachi'el ri itzel ri', y chuka' nyequicot tok ch'aka chic ri quiri' nquibün.

Ri Dios pa ruchojmil nbün juzgar

2 ¹Pero rix nuvinak israelitas, ri nibij que nicanoj ri Dios, si nimirasaj-ivi' y nibij que man utz tuj ri nquibün ri vinük ri nyebanun mac quiri',

man utz tuj ri nibanala'. Roma xa ja ri' chuka' ri nyixtajin rix chubanic, y man nyixtiquer tuj nibij que man jun imac. ²Ketaman-vi c'a que ri Dios nuya' rutojic cheque conojel vinuk roma ri qui mac ye quibanalun. Cachi'el rubanic ri quimac, quiri' ri rutojic nuya'. ³Y rix nim ivakun nina' tok nibij que juis itzel quinojibul ri vinuk ri nyebanun ri mac quiri'. Y xa ja ri' chuka' ri nyixtajin rix chubanic. ¿Ninuc comi, que ri Dios man nuya' tuj rutojic ri imac rix chuka'? ⁴¿Man k'axnuk tuj comi chive achique roma ri Dios jabel utz iviq'uin y achique roma rija' nucuy-vi mac y ncoch'on? Chivuch rix utz que nibun achique na mac ri nijo' nibun y rija' man jun nbun chive. Pero xa man quiri' tuj. Rija' quiri' rubanun-pe iviq'uin rix roma nrajo' que niya' can ri mac. ⁵Xa jac'a rix covirnuk ri ivanima. Man nijo' tuj niya' can ri mac. Y riq'uin ri', xa nimol ri castigo chivij. Nka-ka c'a ri castigo ri Dios pan ivi' chupan ri k'ij tok rija' nbun juzgar. Y rija' nbun juzgar choj vi. ⁶Roma cachi'el ri nkubanun chikajujunal, quiri' ri rutojic ri nuya' cheke. ⁷Si nkucoc'h'on y chi jumul nkac'uj jun c'aslen utz, ri Dios nuya' ri c'aslen man nq'uis tuj cheke. Jari' ri nuya' ri Dios cheke roj ri c'o rayibul kiq'uin richin nkubec'uje' chila' chicaj chi jumul, ri ape' c'o suk ruyon y chiri' chuka' nimirsus-vi kak'ij. ⁸Jac'a si nkapaba-ki' chuvuch ri Dios, nka-ka na vi c'a ri ru-castigo pa kavi'. Y nim vi c'a ri castigo ri nka-ka pa kavi'. Quiri' nkac'ulachij si man nkatakej tuj ri nbij cheke ri ketzij tijonic y xa ja ri man choj tuj nbij ri nkatakej. ⁹Conojel c'a vinuk ri nyebanun itzel, c'ayuf nquic'ulachij, nquitij pokonul. Nabey nka-ka ri castigo pa quivi' ri israelitas y chuka' nka-ka pa quivi' ri man ye israelitas tuj. ¹⁰Y conojel vinuk ri nyebanun ri utz, nyebec'uje' chila' chicaj ri ape' ruyon suk c'o, y ri ape' chuka' nimirsus quik'ij. Ne'uje' uxlanen pa tak canima chi jumul. Y ja ri israelitas ri nabey nban quiri' cheque y c'ateri' chuka' ri man ye israelitas tuj. ¹¹Roma ri Dios junan nbun cheke conojel.

¹²Roj israelitas yo'on-vi c'a ri ley ri xuya' ri Dios richin ri Moisés ri nuc'ut achique rurayibul ri Dios, y si nkabun kamac, ri Dios ja ley ri' ri nucusaj chikij richin nbun juzgar pa kavi' tok ri Dios nbun juzgar conojel vinuk chi jumul. Jac'a ri vinuk ri manak ri ley ri' pa quik'a', si nquibun quimac, nka-ka-vi chuka' ri castigo pa quivi' chupan ri k'ij ri', pero man nucusus tuj ri ley ri' richin nbanux juzgar. Nucusus ri si nkajo' rija' o si man nkajo' tuj. ¹³Ri vinuk ri xaxe ncac'axaj ri nbij ri ley ri xuya' ri Dios richin ri Moisés ri nuc'ut achique rurayibul y man nquibun tuj ri nbij, c'o quimac nquibun chuvuch ri Dios. Jac'a ri nyebanun ri nbij, man jun vi quimac nk'alajin chuvuch. ¹⁴C'o chi jantuk ri vinuk man ye israelitas tuj nquibun ri nbij ri ley ri nuc'ut achique rurayibul ri Dios, stape' (aunque) man cac'axan tuj ri achique nbij. Y quiri', nk'alajin c'a que pa tak canima, c'o-vi ri nk'alajisan chiquivuch achique ri utz y achique ri man utz tuj. Cachi'el xa c'o ta ri ley ri nuc'ut achique rurayibul ri Dios pa tak canima. ¹⁵Cachi'el xa ja ta ri ley ri tz'iban pa tak canima, y jari' ri nbin cheque achique ri utz y achique ri man utz tuj. Y rije' utz nuna' ri canima tok ja ri utz nquibun y k'oxon nuna' ri canima tok

ja ri man utz tuj nquibün. Rije! quetaman, si utz o man utz tuj ri nquibün. ¹⁶Y quiri! chuka! nuna! ri cánima chupan ri k'ij tok nbanux juzgar pa quivi!. Napon c'a ri k'ij tok nbanux juzgar pa quivi! conojel vinük y nquil rutojic ri quimac, chi evan y man evan tuj. Y ri Dios ja ri Jesucristo ri nucasaj richin nbün juzgar. Quiri! nbij ri utzilüj tzij richin colonic ri nintzijo.

Ri israelitas y ri qui-ley ri xuya' ri Dios richin ri Moisés

¹⁷Rix nuvinak, ri juis nyixquicot tok nbix israelitas chive, ninuc que xivil yan ri colonic roma ri Dios, chive rix xuya-vi ri ley ri xuya' ri Dios richin ri Moisés. Y chuka! juis nim ivakün nina! roma nibij que rix rutinamit ri Dios. ¹⁸Rix nibij que nyixtijox riq'uin ri ley ri nuc'ut achique rurayibül ri Dios, y romari! tok ivetaman achique ri nrajo! ri Dios que nkabün, y chuka! ivetaman achique ri utz y achique ri man utz tuj. ¹⁹Y rix ninuc que nyixtiquer nic'ut quibey ri ye moyi!, nic'ut ri sük chiquivüch ri yec'o pa k'eku'n, ²⁰nye'itijoj ri vinük ri man jun quetaman, y nye'itijoj chuka! ri ac'uala!. Roma chive rix yo'on-vi ri ley ri c'o etamabül y c'o ronojel ri ketzij chupan. ²¹Rix nibij que nye'itijoj ri ch'aka chic. ¿Man nc'atzin tuj comi que nitijoj-ka-ivi' rix? Roma nibij cheque ri ch'aka que man utz tuj ri elek!. Y rix ¿ketzij comi que man quixelek! tuj? ²²Rix nibij cheque ri achi'a! ri c'o quixjaylal que man tiquicanoj jun chic ixok, y nibij cheque ri ixoki! ri c'o cachijlal que man tiquiya! k'ij que ntot jun chic achi quiq'uin. Y rix ¿ketzij que man nibün tuj rix quiri'? Rix nibij que que'etzélüs ri dios ri xa man ye ketzij tuj. ¿Y quiri! comi ri nibün rix? ¿Man nivelek'aj tuj comi ri c'o chupan ri cacho rije'? ²³Juis nim ivakün nina! roma c'o ri ru-ley ri Dios pan ik'a!. ¿Ketzij comi que chi jumul nibün ronojel ri nbij ri ley ri!, richin niya! ruk'ij ri Dios? ²⁴¿Man ketzij tuj comi ri nbij chupan ri rutzij ri Dios ri tz'iban can? Tok nbij: Ri vinük ri man ye israelitas tuj nquiyok! rubi! ri Dios tok nquitz'et ri nyixbanun rix. Quiri! ri tz'iban can.

²⁵Roj israelitas banun ri circuncisión cheke, ri retal que roj richin ri tinamit ri Dios, y ri! jabel utz, pero si nkabün ronojel ri nbij chupan ri ley ri xuya' ri Dios richin ri Moisés, ri nuc'ut achique rurayibül ri Dios. Y si man nkabün tuj, man jun nc'atzin-vi que banun ri circuncisión cheke, ri retal que roj ja richin ri tinamit ri Dios, xa junan riq'uin ri man banun tuj ri circuncisión cheke. ²⁶C'o ta jun achi man israelita tuj y man banun tuj ri retal re!, ri circuncisión chin, y rija! nbün ta ri nbij ri ley ri nuc'ut achique rurayibül ri Dios, chuvüch ri Dios junan riq'uin que rija! cachi'el xa banun ta ri circuncisión chin, stape! (aunque) man rubanun tuj. ²⁷Y ri achi ri! nbün-vi ri nbij chupan ri ley ri xuya' ri Dios richin ri Moisés, stape! (aunque) man banun tuj ri retal ri circuncisión chin. Y romari! nk'alajin que rix nuvinak ri man nibün tuj ri nbij ri ley ri nuc'ut achique rurayibül ri Dios, man utz tuj ri nibün y pan ik'a! rix c'o-vi ri ley ri! y banun ri circuncisión chive, ri jun retal ri nibün que rix ja richin ri tinamit ri Dios. ²⁸Rix israelitas vi y banun ri circuncisión chive. Pero man xe tuj ri!

nc'atzin richin nk'alajin que rix rutinamit ri Dios. ²⁹Roma chuvüch ri Dios ri ketzij ye rutinamit rija', ja ri vinük ri c'o jun cánima ch'ajch'oj. Cachi'el banun ta ri circuncisión pa tak cánima. Ri circuncisión ri' nban roma ri Lok'olüj Espíritu y man ja tuj ri circuncisión tz'iban chupan ri ley ri xuya' ri Dios richin ri Moisés. Y jac'a ri vinük ri banun circuncisión pa tak cánima, jari' ri nyeka' chuvüch ri Dios y stape' (aunque) man nyeka' tuj chiquivüch ri vinük.

3 ¹Y yin ninnuc que rix nibij: ¿Achique c'a nuc'ün-pe cheke que roj israelitas? ¿Y achique nuc'ün-pe cheke ri circuncisión? ²Pero yin ninbij: Q'uuiy utz ruc'amon-pe cheke. Pero xaxe c'a ri nabey ri nink'alajrisaj, y ri' ja ri rutzij ri Dios ri ukuxanen can pa kak'a'. ³¿Y nkabij ta c'a que roma ye juis kavinak ri man xquitakej tuj, roma ta ri' ri Dios man ta nbün ri rubin? ⁴Man quiri' tuj. Ri Dios ketzij vi nch'o, stape' (aunque) conojel vinük man quiri' tuj nquibün. Cachi'el ri tz'iban can roma ri David. Rija' rubin can:

Nk'alajin chiquivüch ri vinük que ketzij vi ri nabij.

Y si yec'o vinük ri juis itzel nyech'o chavij, nk'alajin ta chuka' que man ketzij tuj ri nquibij.

Quiri' nbij chupan ri tz'iban can.

⁵Y man tinuc que itzel nbün ri Dios tok nuya' ri castigo pan ivi' roma ri man utz tuj nyixbanun. Y ri' stape' (aunque) nibij rix que roma ri nyixbanun tok nk'alajin que ri Dios xe' ri choj ri nbün. Ri' xa quinojibül ri vinük. ⁶Man ketzij tuj ri nquinuc. Roma si ta ketzij ri quinojibül, ri Dios man ta ntiquer nbün juzgar pa kavi' roj vinük.

⁷Chuka' man tinuc que itzel nbün ri Dios tok nbij aj-maqui' chive y nbün juzgar pan ivi' roma ri tz'ucuj-tzij ri nbün. Y stape' (aunque) rix nibij que romari' tok nk'alajin que ri Dios man quiri' tuj nbün y ri vinük nquiya' ruk'ij romari'. Man tinuc quiri'. ⁸Man tinuc que ri nbün itzel nuc'ün-pe utz. Roma ri achique nyenucun quiri', c'uluman-vi que nka-ka ri castigo pa quivi'. Y yec'o c'a ri ye biyon chikij que roj quiri' chuka' nkanuc, y xa man quiri' tuj.

Man jun c'a ntiquer nbün que man jun tuj rumac

⁹¿Y vocomi achique nibij? ¿Chuvüch ri Dios ri kac'aslen roj israelitas más utz que chuvüch ri quic'aslen ri man ye israelitas tuj? Man quiri' tuj. Cachi'el xinbij yan ka, que conojel vinük, chi israelitas y chi man israelitas tuj, conojel ye tzaknük chuxe' ri mac. ¹⁰Quiri' chuka' nbij ri rutzij ri Dios ri tz'iban can:

Man jun vinük ri katz choj ta ruc'aslen. Nixta jun.

¹¹Ni jun ri k'axnük ta chin ri achique ri' ri utz y man jun chuka' ri ncanon ta chin ri Dios.

¹²Man ja tuj c'a ri rubey ri Dios xquicha' chin xquic'uaj. Man utz tuj c'a ri quic'aslen.

Nixta jun vi vinük ri nbanun ta utz. Ni jun.

¹³Nyebojoyin-vi riq'uín ri quitzij nquibila'.

Ye cachi'el cumütz ri nquibün camic roma riq'uín ri nyech'apon.

Nyecamsan riq'uin ri quitzij, roma pa quichi' cachi'el jul richin camnük.

¹⁴ Chi jumul c'a itzel nyech'o chiquij ri ch'aka chic, c'üy-c'üy ri tzij nquibila'.

¹⁵ Man nquipokonaj tuj cheque nyecamsan. Roma man jun nban cheque, jari' junanin nyebe chin nyecamsan.

¹⁶ Yec'o ri nquiyala' can bis y k'oxon ri ape' nyec'o-vi.

¹⁷ Man quetaman tuj ri achique rubanic ri c'aslen richin uxlanen.

¹⁸ Man nquixbij tuj qui' chuvüch ri Dios.

Quiri' ri tz'iban can.

¹⁹ Y roj ketaman que ri nbij ri ley tz'iban can ri xuya' ri Dios richin ri Moisés, cheque ri yec'o chuxe' ri ley ri' nch'o-vi. Man jun c'a ntiquer nbün que man jun tuj rumac. Conojel c'a ri yec'o chuvüch ri ruch'ulef nc'atzinej que c'a nye'apon vi chuvüch ri Dios. ²⁰ Man jun c'a vinük ri rubanun ta ronojel ri nbij ri ley ri nuc'ut achique rurayibül ri Dios. Y romari' ri ley man ntiquer tuj nbün cheke que man jun tuj kamac nk'alajin chuvüch ri Dios. Ri ley xaxe ntiquer nuc'ut chikavüch que roj aj-mac.

Ri rubanic nkabün richin que man jun kamac nk'alajin chuvüch ri Dios

²¹ Y vocomi ri Dios nuc'ut c'a chikavüch achique rubanic richin que man jun kamac nk'alajin chuvüch rija'. Nuc'ut chikavüch que man riq'uin tuj ri ley ri xuya' ri Dios richin ri Moisés tok choj nk'alajin chuvüch, stape' (aunque) nk'alajin can chupan ri ley y bin can chuka' coma ri xek'alajrisan rutzij ri Dios ri xec'uje' ojer can. ²² Ri Dios nuc'ut c'a chikavüch que achique na vinük ri ntaken ri Jesucristo, man jun rumac nk'alajin chuvüch ri Dios. Xa ja roj junan kabanun konojel, ²³ roma konojel xkabün kamac y nüj xojcanaj-vi can chirij ri Dios ri c'o ruk'ij. ²⁴ Roma ri utzilüj sipanic ri nspaj-pe ri Dios tok man jun kamac nk'alajin chuvüch rija'. Man jun c'a rajil nuc'utuj cheke, roma ri Cristo Jesús xcom, richin xutoj ri kamac. ²⁵ Ri Dios xutük-pe ri Cristo richin xcom, y xbiyin ri ruquiq'uel, roma ja rija' ri xakalen rumac ri vinük. Ri ntaken c'a richin ri Cristo ncuyutuj rumac. Ri Dios runucun-vi-pe que nutük pe ri Cristo, y romari' nk'alajin que choj ri xbün tok man xuya' tuj yan ri rajil-ruqu'uel y ri rutojic ri quimac chiquijunal ri vinük ri xec'uje' ojer can. ²⁶ Y romari' chuka' nk'alajin que choj ri nbün kiq'uin roj chupan ri tiempo re', tok nbün cheke que man jun kamac nk'alajin chuvüch roma kataken ri Jesús.

²⁷ Roma c'a ri' man nkutiquer tuj nkabün nim kakün nixta nkabij que juis utz ri kac'aslen. Roma man xojcolotuj tuj roma juis utz ta ri nkubanun, xa xojcolotuj roma ri xkatakej ri Jesús. ²⁸ Y quiri', nk'alajin c'a que achique na vinük ri ntaken ri Jesús, man jun rumac nk'alajin chuvüch ri Dios, stape' (aunque) man rubanun tuj pe ri nbij ri ley ri xuya' ri Dios richin ri Moisés.

²⁹ ¿Nkutiquer comi nkabij que ri Dios xaxe kichin roj israelitas? Man nkutiquer tuj nkabij quiri', roma ri Dios qui-Dios chuka' ri man

ye israelitas tuj. ³⁰Xaxe c'a jun Dios c'o, y ja rija' ri nbanun cheque ri nyetaken richin rija' que man jun quimac nk'alajin chuvüch, si ja roj israelitas ri banun ri circuncisión cheke chin jun retal que ja roj richin ri tinamit ri Dios, o si ja ri man ye israelitas tuj ri man banun tuj ri circuncisión cheque. ³¹Riq'uin ba' nk'ax chive que ri nyetaken ri Jesús nquibün chin ri ley ri xuya' ri Dios richin ri Moisés que man jun rakalen, pero xa man quiri' tuj. Ri katakaen chic ri Jesús, jari' ri ketzij nkutaken chin ri ley ri'.

Ri Abraham man jun rumac xk'alajin chuvüch ri Dios roma xutakej rija'

4 ¹¿Achique nkabij pari' ri colonic ri xril ri Abraham, ri kaxquin-kamama' can ri katinamit roj israelitas? ²Ri Abraham man jun rumac xk'alajin chuvüch ri Dios, pero man roma tuj ri utz ri xerubanala'. Si ta romari', xtiquer ta xbün nim rakün. Jac'a ri Dios nbij que man roma tuj ri' tok ri Abraham choj xk'alajin chuvüch. ³Roma chupan ri rutzij ri Dios ri tz'iban can, nbij: Ri Abraham xuya' ránima riq'uin ri Dios, y romari' ri Dios xbün chin que man jun rumac xk'alajin chuvüch. Quiri' nbij ri tz'iban can. ⁴Ri vinük ri nsamüj, nuch'üc-vi ri rajil ri rusamaj. Ri nuch'üc man choj tuj nspüs-e chin. ⁵Jac'a ri colonic choj nspüs y man jun c'a ri roma ta ri juis nsamüj ntiquer nucol ri'. Stape' (Aunque) jun vinük man choj tuj ruc'aslen, pero si nutakej ri Dios, ri Dios nbün c'a chin que man jun rumac nk'alajin chuvüch rija'. ⁶Quiri' chuka' rubin can ri David, que jabel utzillüj quik'ij ri vinük ri nban cheque roma ri Dios que man jun quimac nk'alajin chuvüch, roma ri xquitakej y man roma tuj ri juis xesamüj. ⁷Ri David rubin can c'a:

Jabel quiquicot ri vinük ri cuyun chic ri itzel tak nquibanun ri tz'apin chic rij ri quimac.

⁸Jabel c'a ruquicot ri nbix cheque roma ri Ajaf Dios que man jun mac ncakalej.

Quiri' rubin can ri David.

⁹¿Achique c'a ri nuc'ut ri tzij re' chikavüch? Re' nuc'ut chikavüch que man xaxe tuj roj israelitas ri banun ri circuncisión cheke ri jabel kaquicot. Man quiri' tuj. Xa quiri' chuka' ri man ye israelitas tuj, ri man banun tuj ri circuncisión cheque, rije' jabel chuka' quiquicot, ri nc'atzin xaxe c'a tikatakej ri Dios. Cachi'el xbün ri Abraham. Rija' xutakej ri Dios y romari' ri Dios xbün chin que man jun rumac xk'alajin chuvüch. ¹⁰Y tok ri Dios xbün chin que man jun rumac xk'alajin chuvüch, ri Abraham man jani banun tuj ri circuncisión chin, ri jun retal ri xquibün ri israelitas pa ruch'ac'ul jun ac'ual ala' que ja richin ri tinamit ri Dios. ¹¹Y ri circuncisión ri xban chin, retal richin que tik'alajin que ketzij, que man jun vi rumac xk'alajin chuvüch ri Dios roma xutakej. Pero rija' man jun vi c'a rumac xk'alajin chuvüch ri Dios tok c'a man jani banun tuj ri circuncisión chin, y romari' nbix que rija' quitata' conojel ri nyetaken ri Dios y nban cheque que man jun quimac nk'alajin chuvüch, stape'

(aunque) man banun tñj ri circuncisión cheque. ¹²Y ri Abraham kaxquin-kamama' can ri katinamit roj chuka' israelitas ri banun ri circuncisión cheke, ri retal que roj riq'uin ri Dios, pero si kataken ri Dios cachi'el ri xutakej-e rija' tok man jani banun tñj ri retal ri circuncisión chin que ja richin ri tinamit ri Dios.

Ri Dios nuya' rusipanic xaxe cheque ri nyetaken richin rija'

¹³Ri Dios xbij chin ri Abraham que nuya' ri ruch'ulef pa ruk'a', quiq'uin ri ye ruxquin-rumam can. Ri Dios quere' xbij chin ri Abraham roma ruyo'on ránima riq'uin ri Dios y entonces man jun rumac xk'alajin chuvüch, pero man roma tñj rubanun ri nbij ri ley ri xuya' ri Dios richin ri Moisés. ¹⁴Si man ta quiri', si xa ja ta ri vinük ri yec'o chuxe' ri ley ri xuya' ri Dios richin ri Moisés ri nyec'ulun ri sujun can roma ri Dios, man ta jun nc'atzin-vi que kataken ri Dios, roma man ta jun nuc'ün-pe cheke ri rusujun can ri Dios. ¹⁵Pero xa man quiri' tñj. Ri ley ri xuya' ri Dios richin ri Moisés xaxe nuk'alajrisaj que man nkabün tñj ri nbij. Y romari' nka-ka ri ru-castigo ri Dios pa kavi'. Man ta c'o ri ley ri xuya' ri Dios richin ri Moisés, man ta nbix que man nkabün tñj ri nbij.

¹⁶Ri Dios xaxe c'a cheque ri nyetaken richin rija' nuya-vi ri rusujun. Nuya' cheque roma ri rusipanic rija'. Y nuya-vi c'a cheque conojel ri nyetaken, rija' si ye israelitas ri c'o ri ley ri xuya' ri Dios richin ri Moisés pa quik'a' o si man ye israelitas tñj ri manak ri ley ri' pa quik'a'. Ri nc'atzin xaxe tiquitakej, cachi'el xutakej ri Abraham. Roma rija' jari' ri katata' konojel ri kataken. ¹⁷Cachi'el nbij ri Dios chupan ri ye tz'iban can. Rija' nbij c'a chin ri Abraham: Nuyo'on c'a chave que ncatoc quixquin-quimama' can q'uiy tinamit. Quiri' xbij ri Dios chin ri Abraham, tok xuc'ut-ri' chuvüch. Y ri Abraham xutakej ri Dios, ri nc'ason quichin ri caminaki'. Ri Dios ri rutz'eton chic pe c'a ronojel ri runucun que nbün.

¹⁸Ri Abraham xutakej c'a que nbanatñj ri xbix chin roma ri Dios, stape' (aunque) xtiquer ta xbij que c'ayuf chic roma xa ri'lj chic. Xutakej-vi ri xbij ri Dios chin que ntot quitata' q'uiy tinamit y nyec'uje' juis ye q'uiy ruxquin-rumam can. ¹⁹Ri Abraham c'o colope' cien rujuna' chupan ri k'ij ri'. Y roma ri'lj chic, rija' retaman vi que manak chic ral'c'ual nc'uje', y retaman chuka' que ri rixjayil Sara man nalan tñj vi. Man roma tñj ri' xutakej ri xbix chin roma ri Dios. Ruyo'on vi ránima riq'uin. ²⁰Y royoben-vi que ri Dios nbün ri xbij y man ca'i' tñj ránima royoben, xa xuya-vi más ránima y xuya' ruk'lij ri Dios. ²¹Ri Abraham jabel vi retaman chic que ri Dios juis ruchuk'a' riq'uin, nbün-vi ri rubin. ²²Y roma ri Abraham xunimaj ri', ri Dios xbün chin que man jun rumac xk'alajin chuvüch.

²³Y ri nbij chupan ri rutzij ri Dios ri tz'iban can, man xaxe tñj c'a richin tik'alajin achique rubanic tok ri Abraham man jun rumac xk'alajin chuvüch ri Dios, ²⁴xa richin chuka' tik'alajin chikavüch roj achique rubanic richin que man jun kamac nk'alajin chuvüch ri Dios. Si nkatakej ri Dios, rija' nbün cheke que man jun kamac nk'alajin chuvüch. Y ri Dios

jari' ri xc'ason-pe richin ri Kajaf Jesús chiquicojol ri caminaki', ²⁵roma c'a ri kamac roj tok xjach pa camic y c'ateri' xc'astüj-pe richin que man jun kamac nk'alajin chuvüch ri Dios.

Roj ri kataken ri Jesucristo man jun kamac nk'alajin chuvüch ri Dios

5 ¹Man jun vi c'a kamac nk'alajin chuvüch ri Dios roma kataken ri Kajaf Jesucristo. Y matiox c'a chin ri Jesucristo roma tok junan chic kavüch riq'uín ri Dios. ²Roma xkatakaj ri Jesucristo xkil ri utzilüj sipanic ri nspaj-pe ri Dios. Riq'uín c'a rija' kayo'on-vi kánima y ja rija' chuka' nkucusan-apu riq'uín ri Dios. Nkuquicot roma koyoben ri k'ij tok junan nkujc'uje' riq'uín ri Dios. Y rija' c'o ruk'ij. ³Y man xe tütj c'a nkuquicot roma koyoben ri k'ij tok nkubec'uje' riq'uín ri Dios, xa nkuquicot chuka' tok nkac'usaj pokonül, roma ketaman que ri pokonül nbün cheke que más nketamaj nkucoch'on. ⁴Y riq'uín c'a ri coch'oníc ri nketamaj nkac'usaj pokonül, nk'alajin que kayo'on kánima riq'uín ri Dios. Y tok k'alütj que kayo'on más kánima riq'uín ri Dios, re' nbün c'a cheke que más nkoyobej-apu ri utzilüj sipanic ri nspaj-pe rija'. ⁵Y ketzij vi nkil ri koyoben, roma ri Dios juis nkurujo'. Y ketaman c'a que nkurujo', roma ja ri Lok'olüj Espíritu ri ruyo'on pa tak kánima ri nbín cheke.

⁶Roj man nkutiquer tütj nkacol-ki', romari' ri Cristo xcom koma roj, tok xapon ri k'ij. Rija' xcom koma konojel roj vinük, ri xa man utz tütj kac'aslen chuvüch ri Dios. ⁷Ja ta roj, man nkajo' tütj nkucom pa ruq'uexel jun chic vinük, stape' (aunque) choj ruc'aslen. O riq'uín ta c'a ba' c'o ta jun ri man nupokonaj tütj chin que ncom pa ruq'uexel jun chic ri utz ruc'aslen. ⁸Jac'a ri Jesucristo, ri Jun cha'on-pe y takon-pe roma ri Katata' Dios xcom koma roj, stape' (aunque) roj aj-maqui'. Y quiri', ri Dios xuc'ut chikavüch que nkurujo'. ⁹Y quiri' xban kiq'uín tok c'a roj aj-maqui', que ri Jesucristo xcom koma roj. Jac'a vocomi kataken chic y man jun chic kamac nk'alajin chuvüch ri Dios. Romari' k'alütj vi que xojcolotütj chuvüch ri castigo nuya' ri Dios. Y ja ri Cristo ri xbanun que man jun kamac nk'alajin chuvüch ri Dios, roma xcom y xbiyin ruquiqu'uel koma roj. ¹⁰Tok rubanun can, xketzelaj-vi ri Dios. Pero roma ri Ruc'ajol xcom koma roj, romari' tok junan chic kavüch riq'uín ri Dios. Rija' xuya-pe ri Ruc'ajol richin xcom koma y c'a ketzelan na ri Dios chiri'. Y vocomi roma ri junan chic kavüch riq'uín, k'alütj que nkil ri colonic ri chi jumul, roma ri Jesucristo c'üs chi jumul. ¹¹Matiox c'a chin ri Ajaf Jesucristo, que roma ri rusamaj rija' tok nkuquicot riq'uín ri Dios. Rusamaj c'a rija' chuka' tok junan chic kavüch riq'uín ri Dios.

Ri xuc'ün-pe ri Adán y ri xuc'ün-pe ri Jesucristo

¹²Ri mac xaxe c'a roma jun achi tok xoc can chuvüch ri ruch'ulef. Ri achi ri' ja ri Adán. Y ri mac jari' ri xc'amon-pe ri camic. Romari' conojel vinük nc'atzinej que nyecom, roma conojel ye aj-mac. ¹³Tok ri Dios man jani tuya-

pe ri ley ri xuya' richin ri Moisés, c'o chic vi ri mac chuvüch ri ruch'ulef, xa ja ri man jani tüt xk'alajin-pe. Roma xaxe ape' c'o-vi ley, xaxe chirí' ri juis nk'alajin tok jun vinük nbün rumac. ¹⁴Y tok man jani c'o tüt ri ley, stape' (aunque) man k'alüt tüt que c'o mac, xk'alajin-vi, roma conojel xecom. Pa ruk'a' c'a ri camic xec'uje-vi. Ri Adán xcom, quirí' chuka' ri Moisés, y ri ch'aka chic xecom chuka', stape' (aunque) man junan tüt quimac riq'uín ri rumac ri Adán. Ri xbün ri Adán man utz tüt ri xuc'ün-pe, y ri xbün ri Cristo ruyon utz ri xuc'ün-pe. Quirí' nk'alajin-pe tok nkatz'et ri nyebanun.

¹⁵Ri mac ri xbün ri Adán man junan tüt riq'uín ri colonic ri xuc'ün-pe ri Jesucristo. Xa roma c'a ri rumac ri Adán, romari' konojel roj vinük xojoc pa ruk'a' ri camic. Pero ri xbün ri Jesucristo, ruyon utz nuc'ün-pe cheke konojel ri kataken chic. Roma ri rusipanic rija' y roma chuka' ri rusipanic ri Dios kilon chic ri colonic, cachi'el kilon jun sipanic. ¹⁶Ri xuc'ün-pe ri rumac ri Adán, man junan tüt vi riq'uín ri colonic ri xuc'ün-pe ri Cristo. Ri Adán xaxe riq'uín ri jun nabey rumac ri xbün chuvüch ri Dios, xe'ilon chuka' conojel vinük y romari' tok nban juzgar pa quivi', richin nquic'tul rutojic ri nyebanun. Pero ri colonic ri xuc'ün-pe ri Jesucristo juis rakalen, roma man xaxe tüt chic roma ri jun nabey mac tok xpu'tu, xa roma c'a ronojel mac. Y ri colonic ri nuya', xa nuspaj. Y re' nbün cheke que man jun kamac nk'alajin chuvüch ri Dios. ¹⁷Xaxe c'a roma ri rumac ri achi rubini'an Adán, romari' tok conojel vinük xe'oc pa ruk'a' ri camic. Y ketaman que ri samaj ri xbün ri Jesucristo más nim ri ruchuk'a' y romari' k'alüt vi que nyec'ase' chi jumul, ri nyec'ulun ri colonic ri nuspaj. Nbün-vi c'a cheque que man jun quimac nk'alajin chuvüch ri Dios. Nyec'ase' c'a roma ri rusipanic rija' y junan c'a nquibana' juzgar.

¹⁸Roma c'a ri mac ri xbün ri Adán, romari' nka-ka ri castigo pa quivi' conojel ri vinük. Pero roma ri chojmilüt nbanala' ri Jesucristo, romari' tok conojel vinük ri nyetaken, man jun quimac nk'alajin chuvüch ri Dios y nquil ri c'aslen ri man nq'uis tüt. ¹⁹Roma c'a ri xbün ri Adán que man xutakej tüt rutzij ri Dios, romari' conojel vinük xe'oc aj-mac. Jac'a ri Jesucristo xutakej-vi rutzij ri Dios, y romari' juis ye q'uii ri nban cheque que man jun quimac nk'alajin chuvüch ri Dios, roma nquitakej.

²⁰Tok ri Dios xuya' ri ley ri xuya' richin ri Moisés, xebek'alajin c'a pe ri juis ruvüch chi mac. Y roma xek'alajin c'a pe ri mac, más xk'alajin-pe ri utzilüt sipanic ri nspaj-pe ri Dios. ²¹Conojel c'a ri vinük xe'oc pa ruk'a' ri mac, y romari' xe'oc pa ruk'a' ri camic. Jac'a vocomi ri utzilüt sipanic ri nspaj-pe ri Dios nuc'ün-pe cheke ri c'aslen ri man nq'uis tüt, roma nbün cheke que man jun kamac nk'alajin chuvüch ri Dios. Y ja ri Kajaf Jesucristo ri nyo'on ri c'aslen ri man nq'uis tüt cheque ri nye'oc chupan ri utzilüt sipanic ri' ri nspaj-pe ri Dios.

Roj xkaya' yan can c'a ri mac. Vocomi ri c'aslen ri katz'amon, riq'uín chic c'a ri Cristo

6 ¹¿Achi que nkabij vocomi, roj ri kataken chic ri Jesús? ¿Utz que c'a nkabün más kamac richin que más nc'ut ri utzilüt sipanic ri nspaj-pe ri Dios? ²Man utz tüt. Roj xa kayo'on chic can ri mac. ³¿Man ivetaman tüt

c'a que ri bautismo jari' ri retal que roj xa xojcom junan riq'uin ri Cristo Jesús, roma jun kabanun riq'uin? ⁴Tok xojban bautizar, cachi'el xojcom riq'uin, y cachi'el chuka' xojmukutüj riq'uin, tok rija' xmukutüj. Y romari' nkutiquer nkabij que tok rija' xc'astüj-pe roma ri ruchuk'a' ri Katata' Dios, roj chuka' xojc'astüj-pe riq'uin y vocomi kac'uan jun c'ac'a' c'aslen.

⁵Roma jun chic ri kabanun riq'uin ri Jesucristo roma ri rucamic tok xban ri bautismo cheke. Entonces, junan chuka' roj jun chic chuka' kabanun riq'uin rija' roma ri xojc'astüj-pe riq'uin rija'. ⁶Tok rubanun can, xkac'uj jun itzel c'aslen. Pero cachi'el ta xojbajix riq'uin ri Jesucristo chuvüch ri cruz, y romari' ri itzel c'aslen ri' xq'uis can y xojcolotüj pa ruk'a' ri mac. ⁷Conojel c'a ri cachi'el xecom riq'uin ri Cristo, nyecolotüj pa ruk'a' ri mac. ⁸Roj cachi'el xojcom riq'uin ri Cristo tok rija' xcom, y romari' ketaman que nkuc'ase' riq'uin. ⁹Y ketaman chuka' que ri camic manak chic ruk'a' chin ri Cristo. Rija' xc'astüj, y man ncom tüj chic. ¹⁰Tok xcom rija', jari' tok xuyoj ri mac. Xaxe jun bey xcom y riq'uin ri' xbün. Y vocomi c'üs y nuya' ruk'ij ri Dios. ¹¹Y roj man tikamestaj c'a que jun kabanun riq'uin ri Kajaf Cristo Jesús. Cachi'el ta xojcom junan riq'uin y romari' ri mac xcanaj yan can. Y chuka' cachi'el ta xojc'astüj-pe junan riq'uin y romari' nkaya' ruk'ij ri Dios. C'ac'a' chic c'a ri kac'aslen.

¹²Romari' man tikaya' k'ij que ntoc ri mac kiq'uin, richin que man ja tüj ri itzel tak rayibül ri nye'uc'uan kichin. ¹³Tok rubanun can, roj camnük chupan ri mac. Jac'a vocomi man roj quiri' tüj chic, roma kac'uan chic jun c'ac'a' kac'aslen. Romari' tikajacha-ki' pa ruk'a' ri Dios richin nkabün ri nrajo' rija', richin que ri kak'a-kakün nye'ucusüs roma ri Dios chubanic ri choj. Y man tikaya' k'ij que ntoc ri mac kiq'uin, richin que ri kak'a-kakün man quekaj chubanic ri man choj tüj. ¹⁴Ri mac, man jun chic ruk'a' cheke, roma xojcolotüj yan. Man c'a nkaya' kánima riq'uin ri ley ri xuya' ri Dios richin ri Moisés, xa riq'uin c'a ri utzilüj sipanic ri nspaj-pe ri Dios.

Man utz tüj que nkuc'uje' chuxe' rutzij ri mac

¹⁵Pero man roma tüj ri' nkanuc ka: Que nkumacun ta ka, roma nkanuc-ka que ja ri utzilüj sipanic ri nspaj-pe ri Dios ri ncolon kichin y man ja tüj ri ley ri xuya' ri Dios richin ri Moisés. Man quiri' tüj. ¹⁶Rix jabel ivetaman que achique na c'a vinük ri nuya-ri' pa rusamaj jun chic, chuxe' vi c'a rutzij ri rajaf ri samaj c'o-vi. Roma c'a ri' roj si nkaya-ki' chuxe' rutzij ri mac, nkujoc-vi rusamajela' ri mac y xojruc'uj pa camic. Pero si nkaya-ki' chuxe' rutzij ri Dios, nkujoc rusamajela' rija' y xojruc'uj chupan ri c'aslen choj. ¹⁷Pero matiox chin ri Dios que rix riq'uin ronojel ivánima nitakej rutzij. Rixc'o-vi chic chupan ri rutzij ri Dios. Tok rubanun can, xixc'uje' c'a chuxe' rutzij ri mac. ¹⁸Jac'a vocomi man rixc'o tüj chic pa ruk'a' ri mac, xa rix rusamajela' chic ri Dios y ic'uan chic jun c'aslen choj. ¹⁹C'ayuf richin que nk'ax cheke ronojel re', y romari' xincusaj ri ejemplo pari' ri vinük ri nuya-ri' pa rusamaj jun chic. Tok rubanun can, rix xiya' k'ij que xoc ri mac iviq'uin, y ri ik'a-ivakün

xijüch chubanic ri itzel. Jac'a vocomi nc'atzin que ri ik'a-ivakün nye'ucustis roma ri Dios, chubanic ri choj, richin quiri' ch'ajch'oj ta vi ri ic'aslen chuvüch rija'.

²⁰Tok xixc'uje' chuxe' rutzij ri mac, rix man xinuc tuj ba' que nc'atzin que nic'uaj jun c'aslen choj chuvüch ri Dios. Rix libre xina' rix. ²¹¿Y achique xuc'ün-pe chive ri itzel c'aslen ri xic'uaj? Vocomi xa nyixq'uix tok nka-pe chi'ic'u'x ri itzel c'aslen ri', ri xa camic chi jumul nuc'ün-pe pa ruq'uisbül. ²²Vocomi ri mac man jun chic ruk'a' chive, xa rixc'o chic c'a chuxe' rutzij ri Dios, y romari' tok ivilon chic jun c'aslen ch'ajch'oj. Y pa ruq'uisbül nuc'ün-pe ri c'aslen chi jumul. ²³Ri mac xa camic nuc'ün-pe cheke. Jari' ri rutojic ri nuya'. Jac'a ri Dios nspaj ri c'aslen cheke ri chi jumul. Y ja c'aslen re' ri nspüs cheke roma jun kabanun riq'uin ri Kafaf Cristo Jesús.

Tok man jun chic ntiquer nbün ri ley ri nuc'ut achique rurayibül ri Dios

7 ¹Hermanos, rix ivetaman ri achique nbij ri ley ri xuya' ri Dios richin ri Moisés ri nuc'ut achique rurayibül ri Dios, y chuka' ivetaman que jun vinük xaxe tok c'a c'üs na, c'o chuxe' rutzij ri ley ri'. ²Cachi'el ri nbij chupan ri ley, que jun ixok ximon-vi riq'uin ri rachijil y man ntiquer tuj nujüch-ri' riq'uin, tok c'a c'üs. Pero si ncom-e ri rachijil, c'ateri' c'a nujüch-ri' riq'uin. ³Si nc'uje' riq'uin jun chic achi tok c'a c'üs ri rachijil, nbün rumac. Pero si camnük chic ri rachijil, ri ley man nbij tuj que nbün rumac tok nc'ule' chic riq'uin jun achi.

⁴Hermanos, quiri' kabanun roj chuka'. Cachi'el xojcom ta riq'uin ri Cristo, tok rija' xcom. Y romari' man rojc'o tuj chic chuxe' ri ley, xa roj richin chic ri Cristo, ri xc'astüj-pe chiquicojol ri caminaki'. Y roma roj richin chic ri Cristo, nkuc'uan ta jun utzilüj c'aslen y nkuq'uiy ta chupan ri rutzij ri Dios y romari' ye q'uiy ta ch'aka chic nyetaken ri rutzij ri Dios, cachi'el ri nrajo' ri Dios. ⁵Tok rubanun can, ja ri itzel tak karayibül ri xekabanala', y ri ley ri xuya' ri Dios richin ri Moisés nbij que man utz tuj ri itzel tak rayibül ri'. Pero roma quiri' nbij ri ley, xebec'utun c'a pe ri kamac, y tok xkac'axaj ri', xa más xekarayij ri mac ri', y ri mac xa camic nroyoj pa kavi'. Ri mac xerucusaj-vi c'a ri kak'a-kakün. ⁶Tok rubanun can, xojc'uje' chuxe' ri ley ri xuya' ri Dios richin ri Moisés, jac'a vocomi xojcolotuj yan y chuvüch ri ley ri' xa xojcom yan. Tok rubanun can, xkasamajij ri Dios riq'uin ri ley ri xuya' ri Dios richin ri Moisés. Jac'a vocomi nkasamajij ri Dios riq'uin ri c'ac'a' c'aslen yo'on cheke roma ri Lok'olüj Espíritu.

Pablo nutz'ibaj que c'ayuf rubanun ri mac cheke

⁷Y riq'uin ba' nk'ax chive que ri ley ri xuya' ri Dios richin ri Moisés itzel, pero xa man quiri' tuj. Ri ley ri xuya' ri Dios richin ri Moisés nc'atzin richin nuc'ut achique ri mac. Si man ta c'o ri ley ri', yin man ta vetaman achique ri' ri mac. Cachi'el tok tz'iban chupan ri ley ri xuya' ri Dios richin ri Moisés: Man tarayij que avichin ta rat ri ruchajin jun chic vinük. Y roma quiri' tz'iban, vetaman que si quiri' xtinbün,

nquimacun chuvüch ri Dios. Man ta tz'iban can quiri', man ta vetaman que ri' xa mac. ⁸Pero roma chupan ri ley ri xuya' ri Dios richin ri Moisés quiri' nbij, romari' xbek'alajin-pe ri mac ri c'o pa vánima. Xebek'alajin c'a pe ronojel quivüch itzel tak rayibül ri nyenbanala'. Man ta c'o ri ley, camnük ta ri mac ri c'o pa vánima. ⁹Ri ojer can, tok man jani k'axnük tuj ri ley chuve, xinnuc que c'o nuc'aslen. Jac'a ri k'ij tok xk'ax chuve ri tz'iban chupan ri ley ri xuya' ri Dios richin ri Moisés, xc'astuj-pe ri mac ri c'o pa vánima, y jari' xinnabej que manak nuc'aslen. ¹⁰Ri ley ri xuya-pe ri Dios, nuc'ut c'a achique rubanic richin nilituj ta ri c'aslen. Pero yin man xinvil tuj ri c'aslen chupan ri ley ri xuya' ri Dios richin ri Moisés. Pa ruq'uexel ri', xa camic ri xinvil chiri'. ¹¹Y quiri' yin Pablo xinc'ulachij roma ri itzel rayibül ri c'o pa vánima. Ri itzel rayibül xinruch'üc-vi, roma ja ri ley ri xucusaj y xinrucamsaj.

¹²Ri ley ri nuc'ut achique rurayibül ri Dios lok'oluj vi' utz vi y choj ri nbij. ¹³¿Ninbij ta comi c'a que ri utziluj ley xuc'ün-pe camic chuve? Man quiri' tuj. Ja ri itzel rayibül ri xc'amon-pe ri camic, roma xbün chuve que man xintakej tuj ri nbij ri utziluj ley. Y riq'uin ri' ri ley xuc'ut c'a chinuvüch achique ri' ri mac. Y quiri', nuc'ut que ri mac itzel vi.

¹⁴Ketaman que ri ley riq'uin ri Dios petenük-vi. Jac'a yin xa jun vinük ri yinc'o pa ruk'a' ri itzel rayibül. ¹⁵Man ninbün tuj c'a ri utz ri ninjo', xa ja ri mac ri ninvetzelaj, xa jari' ri nyenbanala'. Ri nuc'ulachin, man nka' tuj c'a chinuvüch. ¹⁶Ri mac ri nyenbanala' man nka' tuj chic c'a chinuvüch, y re' nuc'ut que ri ley utz vi. ¹⁷Y romari' nquitiquer ninbij que man nuyon tuj yin ri nquibanun ri mac, xa ja chic ri itzel rayibül ri c'o pa vánima ri nbanun chuve y yin man jun nquitiquer ninbün. ¹⁸Yin xa jun vinük c'a ri man jun utz c'o pa nuc'aslen. Ninjo' yin ninbün ri utz, pero man nquitiquer tuj. ¹⁹Stape' (Aunque) ja ri utz ri ninjo' yin ninbün, man ninbün tuj. Y ri mac ri man ninjo' tuj ninbün, xa jari' ri nyenbanala'. ²⁰Romari' xinbij yan que man nuyon tuj yin ri nquibanun ri mac, roma man ninjo' tuj nyenbanala'. Xa ja ri mac ri c'o pa vánima jari' ri nbanun chuve.

²¹Y yin nintz'et que chi jumul quiri' nbanatuj. Xa cachi'el chic ley, roma tok ninjo' ninbün ri utz, chanin nk'alajin-pe ri itzel rayibül ri c'o pa vánima. ²²Ri vánima, jabel vi nquicot riq'uin ri ru-ley ri Dios. ²³Pero vetaman que c'o chic jun ley ri uc'uayon vichin ri nyerucusaj ri nuk'a-vakün. Y ri jun re' nbün oyoval riq'uin ri nurayij ri vánima. Yinc'o-vi c'a pa ruk'a' y chuxe' rutzij ri itzel rayibül, ri nye'ucusan richin ri nuk'a-vakün.

²⁴C'ayuf ri nuc'ulachin, roma ri itzel tak rayibül ri yec'o viq'uin xa camic nquic'ün-pe chuve. ¿Man jun tuj comi c'a ri nquicolon pa ruk'a' ri itzel tak rayibül re'? ²⁵Matiox chin ri Dios que ri Kajaf Jesucristo xinrucol. Roma man ta ri Jesucristo, yin, jun ta rusamajel ri ru-ley ri mac, roma ri itzel tak rayibül ri yec'o viq'uin. Y ri' stape' (aunque) c'o ri rayibül viq'uin richin que yin jun ta rusamajel ri ru-ley ri Dios.

Tok ja ri Lok'olüj Espíritu nuc'uan kichin

8 ¹Roj ri jun chic kabanun riq'uín ri Jesucristo, ri Jun cha'on-pe y takon-pe roma ri Dios, ri man roj uc'uan tuj chic roma itzel tak rayibül, y xa ja ri Lok'olüj Espíritu ri uc'uayon kichin, vocomi man nka-ka tuj c'a ri nimaltj castigo pa kavi'. ²Xa ja tok xojoc chuxe' ru-ley ri Lok'olüj Espíritu richin c'aslen, jari' tok xojcolotuj chuvüch ri ru-ley ri mac y ri camic, roma ri Jesucristo, ri Jun cha'on-pe y takon-pe roma ri Dios. ³Ri ru-ley ri Moisés man xtiquer tuj xojrucol, roma roj man xkabün tuj ri nbij. Jac'a richin nkucolotuj, ri Dios xutük-pe ri Ruc'ajol chuvüch ri ruch'ulef, xoc vinük cachi'el roj, xaxe c'a rija' man aj-mac tuj. Xcom c'a roma ri kamac, y riq'uín ri' ri Dios xojrucol chuvüch ri ruchuk'a' ri mac. ⁴Quiri' xbün, chin que roj nkutiquer nkac'uaj jun c'aslen choj cachi'el ri nch'o chupan ri ley ri xuya' ri Dios richin ri Moisés. Man roj uc'uan tuj chic roma ri itzel tak karayibül, xa ja chic ri Lok'olüj Espíritu ri uc'uayon kichin.

⁵Ri ye uc'uan roma ri itzel tak quirayibül, benük c'a cánima chirij ri itzel tak quirayibül ri'. Jac'a ri ye uc'uan roma ri Lok'olüj Espíritu, benük c'a cánima chirij ri nrajo' ri Lok'olüj Espíritu. ⁶Ri ye uc'uan c'a roma ri itzel tak quirayibül, xa camic c'a ri nuc'ün-pe cheque. Jac'a ri ye uc'uan roma ri Lok'olüj Espíritu, c'aslen y uxlanen ri nuc'ün-pe cheque. ⁷Ri ye uc'uan roma ri itzel tak quirayibül, nquetzelaj ri Dios. Man nquitakej tuj ri nbij ri ru-ley ri Dios. Man nyetiquer tuj nquitakej. ⁸Ri ye uc'uan roma ri itzel tak quirayibül, man nyetiquer tuj nquibün ri nka' chuvüch ri Dios.

⁹Jac'a roj ri c'o ri Lok'olüj Espíritu richin ri Dios pa tak kánima, man roj uc'uan tuj chic roma ri itzel tak karayibül, xa ja chic ri Lok'olüj Espíritu ri uc'uayon kichin. Y ri Lok'olüj Espíritu petenük roma ri Cristo. Ri vinük c'a ri man c'o tuj ri Lok'olüj Espíritu quiq'uín, man ye richin tuj ri Cristo. ¹⁰Pero si ri Cristo c'o pa tak kánima, c'o kac'aslen ri man nq'uis tuj, roma man jun kamac nk'alajin chuvüch ri Dios. Y ketzij vi que roma ri mac nkucom-e chuvüch ri ruch'ulef, pero riq'uín ri Cristo c'o kac'aslen. ¹¹Ri Dios xbün chin ri Jesucristo, ri Jun cha'on-pe y takon-pe roma ri Dios, que xc'astüj-pe chiquicojol ri caminaki', y quiri' chuka' nbün cheke roj ri c'o ri Lok'olüj Espíritu pa tak kánima. Nkuruc'asoj-e chuka' chiquicojol ri caminaki', roma c'o ri Lok'olüj Espíritu kiq'uín.

¹²Hermanos, roj roj aj-c'as vi riq'uín ri Lok'olüj Espíritu, pero man quiri' tuj quiq'uín ri itzel tak rayibül, richin ja ta ri' ri nye'uc'uan kichin. ¹³Roma si nkuquic'uaj ri itzel tak rayibül, xa camic nquic'ün-pe cheke. Nc'atzin c'a que ja ri Lok'olüj Espíritu ri nuc'uan kichin y nucamsaj ri itzel tak rayibül ri', richin nc'uje' kac'aslen ri man nq'uis tuj.

¹⁴Ri ye uc'uan c'a roma ri Lok'olüj Espíritu richin ri Dios, ye ralc'ual chic ri Dios. ¹⁵Ja tok xkac'ul ri Espíritu ri', jari' tok xojoc ralc'ual ri Dios. Roma tok rubanun can, juis xkaxbij-ki' chuvüch ri castigo ri nuya' ri Dios, cachi'el jun samajel juis nuxbij-ri' chuvüch ri ru-patrón. Jac'a vocomi, roma c'o ri

Lok'olüj Espíritu ri' kiqu'in, man nkaxbij tüt chic ki'. Vocomi Katata' nkabij chin ri Dios. ¹⁶Roma ri Lok'olüj Espíritu nbün cheke que nkana' pa kánima que ketzij roj ralc'ual vi ri Dios. ¹⁷Y roma roj ralc'ual chic ri Dios, roj nkujichinan c'a chuka'. Junan c'a nkujichinan riq'uin ri Cristo. Pero nc'atzin que man tikapokonaj nkatij pokonül, cachi'el xutij pokonül ri Cristo, richin quiri' jabel nyekabana' riq'uin ri Cristo ri c'o ruk'ij.

¹⁸Ri rojc'o chere' chuvüch ri ruch'ulef nkatij pokonül. Pero vetaman que tok nkubec'uje' riq'uin ri Cristo ri c'o ruk'ij, man nka-pe tüt chic chikac'u'x ri pokonül richin ri ruch'ulef, roma juis jabel nyekabana' chila' chicaj. ¹⁹Y ri ruch'ulef y ri ch'aka chic ri ye rubanun ri Dios, riq'uin vi quicot coyoben ri k'ij tok roj ralc'ual jabel nyekabana' riq'uin ri Cristo. Juis vi ncajo' nquitz'et ri k'ij ri'. ²⁰Roma ri ruch'ulef y ri ch'aka chic ri xerübün ri Dios xeyojtüt. Y quere' xquic'ulachij pa ruk'a' ri Dios, pero man roma tüt c'a quimac rije'. Y man richin tüt c'a chi jumul quiri' nyec'uje' can, xa coyoben c'a que nyechojmirüs. ²¹Ri mac xbün c'a chin ronojel ri rubanun ri Dios, que xa nyeq'uis, pero napon c'a ri k'ij tok nyecolotüt chuvüch ri'. Roj ri ralc'ual chic ri Dios, jabel nyekabana' riq'uin rija' ri c'o-vi ruk'ij. Nkucolotüt c'a chuvüch ri man utz tüt. Quiri' chuka' ronojel ri ye rubanun ri Dios, nyecolotüt c'a chuvüch ri man utz tüt y jabel nquibün. ²²Ronojel vi c'a ri ye rubanun ri Dios, roma ri mac nyesujun y nyejilon cachi'el cachi'el njilon jun ixok tok pa ruk'ijul chic nuya' jun ac'ual chuch'ulef. Quiri' quibanun-pe c'a vocomi. ²³Y quiri' roj chuka'. Roma ri mac, ri kánima nk'oxon, njilon c'a ri k'ij ri' chuka'. Juis c'a nkajo' que napon ta yan ri k'ij tok nk'alajin que roj ralc'ual ri Dios, y njalatüt ri kach'acul. Ketaman que quiri' nban cheke, roma yo'on chic ri Lok'olüj Espíritu pa tak kánima. ²⁴Xojcolotüt yan pe chupan ri kamac, pero chuka' c'a c'o na ch'aka chic utz ri ye koyoben. Yec'o ta chic ronojel ri utz ri' kiqu'in, man ta c'a ye koyoben. Roma man jun vinük ri c'a nroyobej si xa c'o chic riq'uin. ²⁵Pero roma c'a man jani yec'o tüt kiqu'in ronojel ri utz ri', romari' c'a ye koyoben na y riq'uin c'a juis coch'onic. Roma kayo'on kánima riq'uin que nyekac'ul.

²⁶Y c'o chic jun chuka'. Ri Lok'olüj Espíritu nkuruto' richin roj nkutiquer nkoyobej riq'uin coch'onic ri utz ri', roma retaman que manak kuchuk'a'. Nkuruto' chuka' riq'uin ri ka-oraciones, roma roj man ketaman tüt achique ri nc'atzin que nkac'utuj chin ri Dios. Nuya' c'a pa tak kánima ri achique nc'atzin que nkac'utuj chin ri Dios. Nuc'utuj-vi c'a koma roj, y nuc'utuj riq'uin jun k'oxon juis nim, ri man nril tüt chic rubixic nbün riq'uin tzij. ²⁷Pero chuvüch ri Dios, nk'alajin-vi ri c'o pa tak kánima y chuka' chuvüch rija' nk'alajin ri nunuc ri Lok'olüj Espíritu y re' stape' (aunque) man nilitüt tüt que xbix chin riq'uin tzij. Ri Lok'olüj Espíritu retaman-vi ri rurayibül ri Dios y jari' ri nuc'utuj koma roj ri lok'olüj tak ralc'ual ri Dios.

**Roma juis ri utzilüj sipanic ri nspaj-pe ri Dios c'o
kiq'uin roj, man jun ri ntiquer chikij.**

²⁸Roj ri nkajo' ri Dios y xojyox roma rija' richin xojoc ralc'ual roma quiri' runucun-pe pa kavi', ketaman c'a que achique na chi pokonül nkac'usaj, c'o utz ri nuc'ün-pe cheke. ²⁹Ri Dios retaman chic c'a kavüch tok man jani nkujalüx tuj chiri', y romari' tok xojrucha' richin nkujoc ta cachi'el ri Ruc'ajol. Ri Dios nrajo' c'a que roj q'uuiy ta ri nkujoc ralc'ual y ja ri Ruc'ajol ri nimalaxel chikacojol. ³⁰Y roj c'a ri xojrucha' ri Dios, xkac'ul-vi c'a ri royonic. Y tok roj royon chic, xbün c'a cheke man jun chic kamac nk'alajin chuvüch. Y tok rubanun chic c'a cheke que man jun kamac nk'alajin chuvüch rija', xaxe chic c'a koyoben ri k'ij tok nbün cheke que utz nyekabana' riq'uin rija' ri c'o-vi ruk'ij.

³¹Y ronojel c'a re' nuc'ut chikavüch que ri Dios kiq'uin vi roj c'o-vi y romari' man jun ntiquer tuj chikij. ³²Ri Dios man xupokonaj tuj c'a chin xuya-pe ri Ruc'ajol mismo, richin que xcom koma konojel roj. Y si xuya-pe ri Ruc'ajol, k'alüj vi que man nupokonaj tuj chin nuya' ronojel ri rusipanic cheke. ³³Ri Dios xojrucha' y man jun kamac nk'alajin chuvüch. Y si ri Dios quere' chic rubanun cheke, ¿c'o ta c'a comi jun ri nkusujun chuvüch rija' que roj man utz tuj ri kac'aslen? ³⁴Chuka' ri Cristo xcom koma roj, y xc'astüj, y vocomi c'o pa rajquik'a' (pa ru-derecha) ri Dios y c'o ri nuc'utuj chin koma roj. Y si ri Cristo quere' rubanun koma roj, ¿c'o ta comi jun ntiquer nc'utuj que tika-ka ri castigo pa kavi'? ³⁵¿Yec'o comi c'a ri ntiquer nujüch-e kavüch riq'uin ri Cristo richin man nkurujo' tuj chic? ¿Ntiker comi c'a nujüch-e kavüch ri pokonül? ¿ri ch'a'oj? ¿o ri nkujetzeliüs roma kataken ri Cristo? ¿ri vayjül? ¿ri manak katziek? ¿o ri peligro kachajin? ¿o ri camic? ³⁶Chupan ri rutzij ri Dios ri tz'iban can, pari' c'a ri' nch'o-vi tok nbij:

Roma roj avalc'ual, ri ch'aka chic vinük chi jumul ncajo'
nkujquicamsaj,
chiquivüch rije' xa roj cachi'el ovejas ri ye richin vi camic.
Quiri' nbij ri tz'iban can.

³⁷Pero xa achique ta na chi pokonül, man ntiquer tuj nujüch-e kavüch riq'uin ri Cristo, roma ri Cristo nkurujo', y roj xa nkuch'acon-vi roma c'o rija' kiq'uin. ³⁸Y yin vetaman, xa man jun ntiquer nujüch-e kavüch riq'uin ri Dios. Ri camic man ntiquer tuj. Ri nkac'ulachij tok c'a roj c'üs na man ntiquer tuj. Ri ángeles man nyetiquer tuj, nixta ri itzel tak espíritu. Ri nquibün juzgar man nyetiquer tuj chuka'. Man jun ri c'o vocomi, nixta jun chuka' ri npu'u chikavüch apu ri ntiquer ta nkuch'aron-e. ³⁹Man jun c'a ri nbanun roma ri Dios ri ntiquer ta nujüch-e kavüch riq'uin ri ronojel ránima ri nkurujo' rija', roma jun kabanun riq'uin ri Kajaf Cristo Jesús, achique na ta rojc'o-vi, si juis chicaj o juis pa xulan.

Man conojel tuj israelitas ye ralc'ual ri Dios

9 ¹Yin, roma nutaken ri Cristo, man nintz'uc tuj tzij. Ri ninjo' ninbij chive ketzij vi. Ri vánima quirí' ri nbij chuve ketzij vi, ²que juis nquibison. Chi jumul c'o nimaluj k'oxon pa vánima. ³Roma yin juis ninjo' que conojel ta ri kavinak israelitas nquitakej ta ri Cristo, y si ta riq'uin ri nquinelestüs-e riq'uin ri Cristo y nka-ka castigo pa nuvi' yin, riq'uin ta ri' nyecolotuj ri ch'aka chic kavinak, ninya' ta k'ij que quirí' nban chuve. ⁴Ri kavinak israelitas q'uiy c'a ri quic'ulun y romari' bin cheque que c'o ri Dios quiq'uin, ri c'o ruk'ij. C'o ri ruch'okobeníc ri Dios quiq'uin. Ri Dios cheque rije' xuya-vi ri ley richin ri Moisés ri nuc'ut achique rurayibül, y xuc'ut chiquivüch achique rubanic richin nquiya' ruk'ij. Y chuka' xbij que nuya' ri rusipanic cheque. ⁵Rije' chuka' ye quixquin-quimam can ri Abraham, ri Isaac y ri Jacob. Y tok ri Cristo xpu'u chere' chuvüch ri ruch'ulef, chiquicojol rije' xalüx-vi. Ri Cristo jari' ri Dios y c'o pari' ronojel. C'o ruk'ij chi jumul. Quirí' vi.

⁶Man tikanuc c'a que ri Dios man rubanun tuj ri utz ri rubin, xaxe roma man ye q'uiy tuj kavinak ri quilon ri utz ri'. Roma ri utz re' xaxe quichin ri ye ketzij israelitas y man quichin tuj ri choj quibini'an israelitas. ⁷Man conojel tuj ri ruxquin-rumam can ri Abraham ye cha'on roma ri Dios. Cachi'el ri nbij chupan ri rutzij ri Dios, tok xbix chin ri Abraham: Chiquicojol ri ye ruxquin-rumam can ri Isaac nyencha-vi ri nye'ilon ri sipanic ri ninya', quirí' xbij ri Dios chin ri Abraham. ⁸Y quirí', nkatz'et que man conojel tuj ri ye ruxquin-rumam can ri Abraham ye ralc'ual ri Dios. Xaxe ri ye cha'on roma ri Dios richin nquil ri rusipanic ri rusujun. Xaxe c'a rije' ri nbix cheque roma ri Dios que ye ralc'ual chic rija'. ⁹Cachi'el tok ri Dios xbij chin ri Abraham: Nquipu'u chic iviq'uin carova juna' apu, roma ri avixjayil Sara nc'uje' jun vit ral, y vit ala'. Quirí' xbij ri Dios chin ri Abraham.

¹⁰Y quirí' vi xbanatuj. Xalüx na vi ri ruxquin kamama' Isaac ojer can tiempo. Y tok ri Isaac rilon chic, ri rixjayil Rebeca xeralaj ca'l' ac'uala' ye cuach. ¹¹Y roma ri xquic'ulachij quiq'uin ri ca'l' ac'uala' ri', nk'alajin-vi que ri Dios man nkurucha' tuj roma ri kabanun. Rija' nyerucha' ri runucun que nyerucha'. Roma tok man jani que'alüx ri ca'l' ac'uala' ri', y man jani tik'alajin ri nyebanun si utz o man utz tuj, ¹²ri Dios xbij yan chin ri te'ej: Ri nimalaxel nc'uje' pa ruk'a' ri chak'laxel. ¹³Y chuka' chupan ri rutzij ri Dios ri tz'iban can, nbij: Ri Jacob nucha'on-vi. Jac'a ri Esaú man nucha'on tuj. Quirí' nbij ri tz'iban can.

¹⁴Y man tinuc que man choj tuj ri xbün ri Dios que ja ri Jacob ri xucha' y man ja tuj ri Esaú. ¹⁵Cachi'el ri nbij ri rutzij ri Dios, tok xbix chin ri Moisés: Ri ninjoyovaj ruvüch, ninjoyovaj-vi ruvüch. Y ri ninto', ninto-vi. Quirí' xbij ri Dios chin ri Moisés. ¹⁶Nk'alajin c'a que ri Dios nuya' ri utziluj rusipanic cheke roma nujoyovaj kavüch, y man roma tuj ri juis nkajo' o roma ta ri nkujel-nkujoc chucanoxic. ¹⁷Y re' ketzij vi. Cachi'el ri nbij chupan ri rutzij ri

Dios ri xbij ri Dios chin ri Faraón: Xatinya' pa ruch'ulef Egipto richin nabün pari'. Quiri' nbanun chave richin nk'alajin ri vuchuk'a' roma ri nac'ulachij. Ninjo' c'a que ntzijos ri nubi' pa ronojel tinamit. Quiri' xbij ri Dios chin ri Faraón. ¹⁸Y quiri', nkatz'et que riq'uin ri Dios c'o-vi que nujoyovaj ruvüch jun vinük o si xa nucovirsaj ri ránima chupan ri itzel ruc'aslen.

¹⁹Pero man roma tuj ri' rix utz ta que ninuc-ka: Si xa riq'uin c'a ri Dios c'o-vi que nujoyovaj ruvüch jun vinük, y riq'uin chuka' rija' c'o-vi que nucovirsaj ránima jun vinük, ¿achique c'a roma tok aj-maquí' nbj cheke? Y re' man kamac tuj roj. Roma roj vinük man c'uluman tuj que nkapaba-ki' chuvüch rija' ri nrajo' nbün cheke. Pero rix man jun bey c'a tipu'u jun nojibül cachi'el ri' pan ijolon. ²⁰Pero yin ninbij c'a: Roj vinük, man nkutiquer tuj nkabij chin ri Dios que man utz tuj ri nbün. ¿Utz comi que jun bojo'y nbj ta chin ri nusamajij richin: ¿Achique roma ja nubanic re' ri nabün chuve? Man c'uluman tuj c'a que nbj quiri'. ²¹Roma riq'uin ri jun achi ri nyerusamajij bojo'y npu'u-vi achique ri nbün riq'uin ri juch'akaj ch'abük. Roma riq'uin ri ch'abük re' ntiquer nbün jun bojo'y ri nim rakalen o jun ri man nim tuj rakalen.

²²Y quiri' ri Dios, pa ruk'a' rija' c'o-vi richin xunuc nuc'ut ri ruchuk'a' y ri ru-castigo pa quivi' ri vinük ri nquibün quimac. Pero juis ye rucoch'on stape' (aunque) c'uluman que xka-ka ta yan ri ru-castigo pa quivi' y xeq'uis ta yan chupan. ²³Y chuka' pa ruk'a' rija' c'o-vi richin nuk'alajrisaj que jabel utz runa'oj kiq'uin roj ri kilon chic ri utzilüj sipanic ri nspaj-pe rija'. Ruchojmirsan chic ri kac'aslen richin que jabel nyekabana' riq'uin rija', ri c'o ruk'ij. ²⁴Quiri' chic rubanun kiq'uin roj ri xojroyoj. Man xe tuj ri ye royon-pe chikacojol roj israelitas, xa quiri' chuka' ri ye royon-pe chiquicojol ri man ye israelitas tuj. ²⁵Cachi'el ri nbj ri Dios chupan ri vuj ri tz'iban can roma ri Oseas:

Ri vinük ri man ye nutinamit tuj, ninbün c'a cheque que nye'oc nutinamit. Man yinquijo'on tuj pe, pero nyenjo' c'a.

²⁶Chuka' chupan ri vuj ri rutz'iban can ri Oseas nbj:

Ri vinük ri xbij cheque roma ri Dios: Rix man rix nutinamit tuj, napon ri k'ij tok nbix cheque chiri' ri ape' yec'o-vi: Rix, rix ral'c'ual chic ri c'aslic Dios.

²⁷Y chikij roj israelitas, c'o ri xbij ri Isaías ojer can. Rija' riq'uin c'a ruchuk'a' xch'o y xbij: Roj ri ruxquin-rumam can ri Israel, juis roj q'uiy. Roj cachi'el ri sanayi' chuchi' ri nimalüj mar, roma man jun ri ntiquer ta najlan. Pero man roj q'uiy tuj ri nkucolotüj. ²⁸Ri Ajaf Dios rubin c'a que nuya' ru-castigo pari' ri karuch'ulef. Y chanin c'a nbanatüj, y pa ruchojmil tok nbanatüj. ²⁹Ri Isaías rubin c'a chuka':

Ri Dios ri Rajaf ronojel,
si ta nkuruq'uis konojel,
nkac'ulachij ta chuka' cachi'el ri xquic'ulachij ri tinamit Sodoma y
Gomorra ojer can.
Quiri' xbij ri Isaías.

Ye q'uiy israelitas ri man quilon tuj ri c'aslen choj chuvuch ri Dios

³⁰Y ronojel re' nuk'alajrisaj chikavuch que ri man ye israelitas tuj y man ta quitijon quik'ij richin que man jun tuj quimac nk'alajin chuvuch ri Dios, xa jari' ri xe'ilon. Quiri' c'a nban cheque conojel ri nquiya' canima riq'uin ri Jesucristo. ³¹Jac'a ri kavinak israelitas, nquitij-vi quik'ij richin que man jun tuj quimac nk'alajin chuvuch ri Dios. Juis c'a nquitij quik'ij richin nquibun ta ri nbij chupan ri ru-ley ri Dios, pero man nyetiquer tuj. ³²¿Y achique roma? Roma man quitaken tuj ri Jesucristo. Xa ja ri ley ri xuya' ri Dios richin ri Moisés ri juis nquitij quik'ij richin nquibun y man ncajo' tuj nquitakej ri Jesucristo. Romari' xquitopij cakun chuvuch ri Abuj. Y ri Abuj ri' ja ri Jesucristo. ³³Cachi'el ri nbij ri Dios chupan ri tz'iban can pari' Jesucristo:

Yin ninya' c'a ri Abuj pa tinamit Sion, y yec'o vinuk ri xa nquipaxij-qui' chuvuch ri Abuj ri' y nyetzak.

Jac'a ri nyetaken richin, man jun bey nyeq'uix ta, roma ri utz ri bin cheque que nbequila', nbequila-vi.

Quiri' nbij chupan ri tz'iban can.

Ri rurayibul ri Pablo quiq'uin ri ruvinak israelitas

10 ¹Hermanos, ri ninc'utuj yin chin ri Dios y ri rurayibul chuka' ri vanima, ja ta que ri kavinak israelitas nyecolotuj ta vi chuvuch ri quimac. ²Yin vetaman que rije' nquitij quik'ij richin nquitzekebej ri Dios, pero man quietaman tuj ri achique rubanic nquibun. ³Man quietaman tuj c'a ri achique rubanic nquibun richin man jun quimac nk'alajin chuvuch ri Dios. Man quietaman tuj que ja ri Dios nbanun. Y romari' nquitij quik'ij richin que nquibun ri nbij ri ley ri xuya' ri Dios richin ri Moisés, y man nquitakej tuj ri Jesucristo ri takon-pe roma ri Dios, richin que man jun quimac nk'alajin chuvuch. ⁴Ri ley ri xuya' ri Dios richin ri Moisés xtane' tok xka-pe ri Cristo. Quiri' xbanatuj richin que achique na ri ntaken richin ri Cristo man jun rumac nk'alajin chuvuch ri Dios.

⁵Ri Moisés rutz'iban can c'a ri achique rubanic nrajo' richin que riq'uin ri ley man jun quimac nk'alajin chuvuch ri Dios. Rija' rutz'iban can c'a: Ri nbanun ronojel ri nbij ri ley re', nril-vi ruc'aslen riq'uin ri Dios. Quiri' ri rutz'iban can.

⁶Pero ri rubanic richin que man jun kamac nk'alajin chuvuch ri Dios, ja ri nkatakej ri Cristo. Y pari' re' nbix c'a: Man tikabij pa tak canima: ¿Achique nbe chila' chicaj richin nberuc'ama-pe ri Cristo? Roma rija' xka-pe yan. ⁷Y man tikabij chuka': ¿Achique ta c'a nbe quiq'uin ri caminaki', ri ape' yec'o-vi, richin nberuc'ama-pe ri Cristo? Roma rija' xc'astuj yan e. ⁸Chupan ri rutzij ri Dios nbij: Ri tzij man nuj tuj c'o-vi, xa pan avanima c'o-vi, y pan achi' chuka'. Quiri' nbij chupan ri rutzij ri Dios. Y ja tzij ri' ri nkatziyoj, y nbij que nc'atzin nkatakej ri Jesucristo. ⁹Nbij que nc'atzin que nabij que ri Jesús jari' ri Ajaf, y nc'atzin chuka' que nanimaj riq'uin ronojel avanima que ri Katata' Dios xbun chin

ri Jesús que xc'astüj-pe chiquicojol ri caminaki'. Si nabün quiri', ncacolutüj.

¹⁰Richin ncacolutüj y man jun amac nk'alajin chuvüch ri Dios, pan avánima c'a tipu'u-vi richin natakej y chuka' nc'atzin que nabij que ja ri Jesús jari' ri Ajaf.

¹¹Y chupan ri rutzij ri Dios ri tz'iban can, nbij: Conojel ri vinük ri nyetaken richin, man jun bey nyeq'uix tuj, roma ri utz ri bin cheque que nquic'ul, nquic'ul-vi. Quiri' nbij ri tz'iban can. ¹²Junan nbün cheke si roj israelitas o si man roj israelitas tuj. Ri Ajaf, Kajaf vi c'a konojel y nuya-vi ri utz cheque ri nyec'utun.

¹³Cachi'el ri nbij chupan ri rutzij ri Dios ri tz'iban can: Conojel c'a ri nyec'utun que ja ri Ajaf Dios ri nto'on quichin, nyecolutüj-vi. Quiri' ri nbij. ¹⁴¿Pero ntiquer comi jun vinük nuc'utuj chin ri Jesucristo que ticolotüj, si xa man nutakej tuj que ja rija' ri Colonel? ¿O ntiquer comi chuka' nutakej, si xa man rac'axan tuj pari' ri Colonel? ¿Y ntiquer nrac'axaj, si xa man jun ntzizjon chin? ¹⁵¿Y ntiquer comi que c'o ta jun ri ntzizjon, si man ta jun takayon richin? Y chupan ri rutzij ri Dios ri tz'iban can, nk'alajin que yec'o ri ye takon, roma nbij: Juis quicot tok nye'apon ri nyetzizjon ri utzilüj tzij richin colonic. Nquitzizjoj achique rubanic richin nc'uje' uxlanen pa kánima. Quiri' nbij chupan ri tz'iban can.

¹⁶Xaxe c'a man conojel tuj vinük nyetaken ri nbij ri utzilüj tzij richin colonic. Cachi'el ri rutz'iban can ri Isafas: Ajaf, ¿ri atziz ri xkatzizjoj cheque ri vinük, ye q'uuy ri xeniman? Quiri' ri rutz'iban can ri Isafas. ¹⁷Richin nkatakej, nc'atzin que nkac'axaj na ri tzij. Y ri tzij ri nc'atzin que nkac'axaj ja ri rutzij ri Dios.

¹⁸Y yin ninbij que ri rutzij ri Dios etaman, roma chupan ri tz'iban can, y quere' c'a nbij:

Hasta pa ruq'uisbül c'a chin ri ruch'ulef ye'apon-vi ri nyek'alajrisan richin.

Xa ape' na c'a yec'o-vi ri vinük, chiri' c'a nquik'alajrisaj-vi chuka'.

Quiri' nbij chupan ri tz'iban can.

¹⁹Y yin nbij c'a chuka' que ri kavinak israelitas quetaman c'a ri nbij ri rutzij ri Dios. Tikatz'eta' na pe' nabey ri nbij ri Dios chupan ri jun cheque ri vuj ri ye rutz'iban can ri Moisés:

Yec'o ri man ye nutinamit tuj y man jun achique ta quetaman.

Pero cheque rije' ninya-vi ri nusipanic y romari' rix itzel nina' chiquij.

Quiri' ri tz'iban can.

²⁰Pero más k'alüj ri tz'iban can roma ri Isafas, roma ri Dios nbij:

Ri vinük ri man xinquicanoj tuj, xinquil.

Xinc'ut c'a vi' chiquivüch, stape' (aunque) man xinquicanoj tuj.

Quiri' ri tz'iban can.

²¹Pero ri Dios nbij c'a chiquij ri kavinak israelitas: Chi jumul c'a nyenvoyoj richin nyepu'u ta viq'uín, jac'a rije' xa nquipaba-qui' chinuvüch y man nquitakej tuj nutziz. Quiri' ri tz'iban can.

Ri Dios yec'o chuka' ye rucha'on chiquicojol ri israelitas

11 ¹Y yin ninbij c'a que ri Dios man ye retzelan tuj can ri israelitas, ri rutinamit. Roma yin vilon ri utzilüj sipanic ri nspaj-pe ri Dios. Y yin

yin israelita chuka'. Ri Abraham jari' ri nuxquin-numama' ojer can, y quiri' chuka' ri Benjamín. ²Ri Dios man retzellan tüt can ri rutinamit. Ri Dios pa rutz'quic retaman-pe ruvüch. ¿Man ivetaman tüt c'a ri nbij chupan ri rutzij ri Dios ri tz'iban can, pari' ri Elías, jun achi ri xuk'alajrisan ri rutzij ri Dios ojer can? Ri Elías xch'o riq'uín ri Dios pari' ri ruvinak israelitas, y xbij: ³Ajaf, xequivulaj ri altares ri avichin rat y xequicamsaj ri ch'aka chic asamajela' ri xek'alajrisan chuka' ri atzij. Xa nuyon chic oc yin, pero yiniquicanoj chuka' richin yiniquicamsaj. Quiri' xbij ri Elías chin ri Dios. ⁴¿Y achique xbij ri Dios chin ri Elías? Ri Dios xbij: Man ayon tüt ratc'o viq'uín. C'a yec'o na siete mil ri yec'o viq'uín, ri man quiyo'on tüt ruk'ij ri vachbül ri dios (tiox) ri man ketzij tüt ri rubini'an Baal. Quiri' xbij ri Dios chin ri Elías. ⁵Y quiri' chuka' vocomi yec'o kavinak israelitas ri junan roj cha'on quiq'uín roma ri utzilüt sipanic ri nspaj-pe ri Dios. ⁶Ri ye cha'on roma ri utzilüt sipanic ri nspaj-pe ri Dios, man ye cha'on tüt roma ri jabel quibanun. Si ta ye cha'on roma ri jabel quibanun, man ta nbix que ye cha'on roma ri utzilüt sipanic ri nspaj-pe ri Dios.

⁷Y re' nuk'alajrisaj c'a chikavüch que ri kavinak ri ye cha'on roma ri Dios xquil ri colonic. Jac'a ri ch'aka chic kavinak ri man ye cha'on tüt roma ri Dios man xquil tüt ri colonic, xa xcovirsüs cánima. ⁸Cachi'el ri nbij chupan ri rutzij ri Dios ri tz'iban can: Ri Dios xuya' cheque cachi'el jun nimalütj varan. Cachi'el ta ye moyirñuk y man nca'axaj tüt. Quiri' quibanun-pe. Quiri' nbij chupan ri tz'iban can. ⁹Y ri rey David rubin can chuka':

Ri nimak' tak quiva'in ntoc ta c'a qui-trampa y tz'ambül quichin.

Ja ta c'a ri' ri xtitzakon quichin y ntoc ta rutojic ri quibanun.

¹⁰Xtichuptüt ta c'a ri runak' tak quivüch, richin man ta xquetzu'un.

Roma ta ri pokonül, ye luculic ta chi jumul.

Quiri' ri rubin can ri David.

Ri Dios xusuj c'a ri colonic cheque ri vinük ri man ye israelitas tüt

¹¹Y ronojel re' man nbij tüt c'a que ri kavinak richin ta chi jumul tok xquitopij cakün y xetzak. Man quiri' tüt. Ri Dios richin nuc'asoj c'a jun rayibül quiq'uín richin nquitakej ta ri rutzij, xusuj c'a chuka' ri colonic cheque ri vinük man ye israelitas tüt. ¹²Ri kavinak xquetzelaj c'a ri Dios, y romari' ri Dios xusuj ronojel ri utzilüt sipanic ri nspaj-pe rija' cheque ri ch'aka chic vinük ri man ye israelitas tüt. Pero más q'uiy ta c'a ri utzilüt sipanic ri nspaj-pe ri Dios ri nyepu'u tok ri kavinak nquitakej.

¹³Y c'o c'a chuka' ri ninjo' ninbij cheque ri man ye israelitas tüt: Yin, jun apóstol ri takon-pe cheque ri man ye israelitas tüt. Ninya-vi c'a ruk'ij ri nusamaj. ¹⁴Y riq'uín re' ninjo' c'a ninc'asoj jun rayibül quiq'uín ri nuvinak richin nyecolotüt ta roma nquitz'et c'a ri nusamaj chiquicojol ri man ye israelitas tüt. ¹⁵Roma ri ch'aka chic ri man ye israelitas tüt xc'amür c'a quivüch roma ri Dios, y jare' ri xpu'u tok ri Dios xeruya' can ri nuvinak israelitas roma ri man xquitakej tüt chic. Pero más ta c'a ri utzilüt sipanic ri

nspaj-pe ri Dios ri nyepu'u tok ri nuvinak ne'amür chic quivüch roma ri Dios. Jari' c'a nkuc'astüj, y nutz'om-e jun c'ac'a' c'aslen. ¹⁶Vocomi nincusaj jun ejemplo pari' ri kavinak israelitas: Xa ye cachi'el c'a ri nabey sipanic ri nban chin ri Dios. Roma ri nabey caxlan-vüy ri nspüs chin ri Dios, lok'olüj vi, y quiri' c'a chuka' ri que'en ri ntel-vi-pe, lok'olüj vi. Ri israelitas ye cha'on-vi c'a. Roma si cha'on c'a ri ruxe' jun che', quiri' c'a chuka' ri ye ruk'a' ri ye cha'on-vi. ¹⁷Ri nuvinak israelitas ye cachi'el ri che' rubini'an olivo, ri ticon y utz vi. Pero yec'o ruk'a' ri xejok'otüj-e. Y rix ri man rix israelitas tuj man rix ruk'a' tuj ri che' ri', xa rix richin jun chic olivo ri man ticon tuj, ri xa ruyon xel-pe. Pero rix cachi'el jun che' nban injertar pari' ri nabey che' ri ticon y q'uuiy utz ivilon. ¹⁸Pero man c'uluman tuj que ninimirsaj-ivi' rix y nikasaj ta quik'ij ri nuvinak ri xe'elesüs-e. Man c'uluman tuj que ninimirsaj-ivi', roma ivetaman que man ja tuj ri ruk'a' ri che' ri ye tz'amayon richin ri ruxe', xa ja ri ruxe' ri tz'amayon quichin ri ruk'a' ri che'. Y rix xa rix ruk'a' ri che' y man rix ruxe' tuj.

¹⁹Y rix riq'uin ba' ninuc: Roj c'uluman que nkanimirsaj-ki', roma yec'o ruk'a' ri che' ri xejok'otüj-e, richin que ja roj ri xojtcox can pa quiqu'uxel. ²⁰Pero yin ninbij: Rije' roma ri man xquitakej tuj ri Dios, romari' tok xe'elesüs-e. Y rix xaxe roma ri itaken ri Dios tok rixc'o can pa quiqu'uxel. Roma c'a ri' man c'uluman tuj que ninimirsaj-ivi'. Xa tixbij-ivi'. ²¹Roma ivetaman que ri Dios man xerupokonaj tuj quivüch ri nuvinak israelitas. Xa xerelesaj-e, stape' (aunque) rije' ye ruk'a' vi ri che' ri'. Si quiri' xbün quiqu'uin rije', rix chuka' man nyixrupokonaj tuj. ²²Tivetamaj-vi c'a que ri Dios juis njo'on, pero chuka' nuya' rutojic ri mac. Ri ye tzaknük chupan ri quimac, rija' nuya' rutojic ri quimac. Ja rix ruyo'on ri utziluj rusipanic chive, pero ne'atzin que niya' ivánima riq'uin. Roma si man niya' tuj ivánima riq'uin, rix chuka' nyixelesüs-e. ²³Y si ri nuvinak nquitakej, nyec'amür c'a. Ri Dios ntiquer nyeruc'ün jun bey chic. ²⁴Rix rix cachi'el c'a ruk'a' jun olivo ri man xtcox tuj, ri xa ruyon xel-pe, pero xixelesüs-pe riq'uin ri che' ri' y xixtcox pari' ri olivo ri ticon, stape' (aunque) man rix richin tuj ri che' ri'. Y si quiri' xban chive rix, ja yan ta chic c'a la' ri nuvinak israelitas que man ta nyeticox jun bey chic pari' ri che' ticon, roma rije' ye richin vi ri che' ri'.

Tok nyecolotuj ri israelitas

²⁵Hermanos, ninjo' que rix ivetaman ta ri c'ate ba' xuk'alajrisaj ri Dios, man xa tina' que juis ik'ij roma ri ninuc-ka iyon. Y romari' ninbij-e chive ri xa c'are' xuk'alajrisaj ri Dios, que ri nuvinak israelitas ri covirnük ri cánima y man ncajo' tuj nquitakej ri Dios, quiri' c'a nyec'uje', tok nyecolotuj can ri ch'aka chic ri man ye israelitas tuj. ²⁶Pero c'o jun k'ij ri npu'u tok nyecolotuj can conojel ri nuvinak israelitas ri nyec'ase' chupan ri k'ij ri'. Cachi'el nbij ri rutzij ri Dios ri tz'iban can:

Que ri Colonel npu'u pa tinamit Sión,

y nrelesaj-e ri itzel chiquicojol ri ye ruxquin-rumam can ri Jacob.

²⁷Y yin nincuy ri quimac.

Jare' ri trato ri xinbün quiq'uin.

Quiri' nbij ri Dios chupan ri tz'iban can.

²⁸Yec'o nuvinak israelitas ri nquetzelaj ri Dios, roma man quitaken tñj ri utzilñj tzij richin colonic. Y roma c'a ri man quitaken tñj, ri Dios xuya' ri utzilñj rusipanic chive rix ri man rix israelitas tñj. Pero ri Dios c'a nyerujo' c'a ri nuvinak, roma ye rucha'on y roma chuka' ri rusipanic ri xusuj cheque ri kaxquin-kamama' ojer can. ²⁹Roma tok ri Dios nuya', man nresesaj tñj chic. Y tok nroyoj ri rutinamit, man nutzolij tñj chirij. ³⁰Tok rubanun can, rix ri man rix israelitas tñj man xitakej tñj ri Dios. Jac'a tok ri nuvinak israelitas xquiya' can ri Dios, rija' xusuj ri utzilñj rusipanic chive rix, y rix xic'ul. ³¹Ri nuvinak man quitaken tñj ri Dios vocomi, pero napon ri k'ij tok ri Dios nusuj jun bey chic ri utzilñj rusipanic cheque, y nquic'ul ri utzilñj rusipanic, cachi'el ri xibün rix. ³²Ri Dios nuk'alajrisaj c'a que conojel vinük ye aj-maquí' roma nrajo' nusuj ri utzilñj rusipanic cheque.

³³Ri Dios juis vi utz, juis vi beyomül y etamabül c'o riq'uin. Roj man nk'ax ta cheke ri runa'oj, y man nk'ax ta chuka' cheke ri nbanun.

³⁴Cachi'el ri tz'iban chupan ri rutzij ri Dios: ¿C'o comi jun vinük ri k'axnük chin ri achique nunuc ri Ajaf Dios? ¿O c'o comi jun ri rubanun ta rubin chin ri Dios ri achique ri utz que nbün? ³⁵¿O c'o comi jun vinük ri nyo'on jun sipanic chin ri Dios, richin que ri Dios nc'atzinej que nuya-pe ri rajil-ruq'uexel chin? Man jun. Quiri' nbij ri tz'iban can. ³⁶Roma ja rija' ri xbanun ronojel. Riq'uin vi c'a rija' petenük-vi ronojel. Y ronojel ri xerubün, richin que nuya' ruk'ij. Tinimirsüs c'a ruk'ij ri Dios chi jumul. Quiri' ta c'a.

Ri rubanic ri c'aslen ri nka' chuvüch ri Dios

12 ¹Hermanos, ri Dios juis c'a nujoyovaj c'a kavüch. Romari' ninc'utuj favor chive que tic'utu' c'a ri matioxinic c'o iviq'uin. Tijacha-ivi' pa ruk'a' ri Dios. Cachi'el xban cheque ri chico ri xesujüs chin ri Dios, quiri' chuka' tibana' rix, tiya' ri ic'aslen chin ri Dios. Jun lok'olij c'aslen, jun c'aslen ri nka' chuvüch ri Dios, jari' tiya' chin, y quiri' rix ketzij niya' ruk'ij ri Dios. ²Man titzeklebej ri quic'aslen ri vinük ri c'a quiyo'on cáñima riq'uin ri ruch'ulef. Xa tiya' k'ij chin ri Dios richin nujül ri inojibül, richin quiri' tijalatuj c'a chuka' rubanic ri ic'aslen. Y quiri' nivetamaj ri achique nrajo' ri Dios que nkabün. Ri nrajo' rija', ja ri utz, ri jabel y ri tz'akatinük.

³Ri Dios xuya' ri utzilñj rusipanic chive y xinruya' chupan ri rusamaj. Romari' yin ninbij chive chil'ivonojel: Man tinimirsaj-ivi', roma man c'uluman tñj que quiri' nibün. Nc'atzin que titz'et-ka-ivi', si ketzij iyo'on ivánima riq'uin ri Dios y si nyixtajin chubanic ri samaj ri yo'on chive roma ri Dios. Roma konojel jalajoj ruvüch kasamaj ruyo'on. ⁴Cachi'el rubanun chin ri kach'acul, c'o ruk'a', c'o rakün, c'o runak'-ruvüch, pero man junan tñj quisamaj. ⁵Y quiri' chuka' roj ri kataken ri Cristo, roj q'uiy y man junan tñj ri kasamaj. Pero junan kavüch y nkatola-ki' roma jun kabanun riq'uin ri Cristo.

⁶Kac'ulun c'a ri utzilüj sipanic ri nspaj-pe ri Dios, roma rubanun cheke chikajujunal, que c'o jun kasamaj ruyo'on. Romari', si c'o ri nuk'alajrisaj ri Dios cheke, tikak'alajrisaj c'a cheque ri ch'aka chic. Y tikak'alajrisaj c'a ri kac'ulun. ⁷Si nkutiquer nyekato' ri ch'aka chic, quekato'. Si nkutiquer nkutijon, kojtijon. ⁸Si nkutiquer nkacukuba' quic'u'x ri ch'aka chic, tikabana'. Si nkutiquer nyekato' riq'u'in ri katumin, quekato' riq'u'in ronojel kánima. Si ja roj ri nkuc'uan quichin, tikatija' kak'ij que utz quic'uaxic kabana'. Si nkutiquer c'a nyekato', quekato' c'a riq'u'in quicot.

Ri nrajo' ri Dios richin nquibün ri ye ralc'ual chic

⁹Tijola' c'a ivi' riq'u'in ronojel ivánima. Tivetzelaj ri man utz tuj y tic'uaj ri utz. ¹⁰I-hermanos ivi' roma itaken ri Cristo. Roma c'a ri' tijola-ivi' riq'u'in ronojel ivánima y tinimala-ivi'.

¹¹Man quixk'oran, xa riq'u'in ronojel ivánima tibana' ri rusamaj ri Ajaf.

¹²Tiquicot ri ivánima roma ivoyoben ri utz ri nuya' ri Dios. Ticocho' ri pokonül ri nic'usaj. Chi jumul tibana' orar. ¹³Tok yec'o ch'aka ri quitzekleben-vi ri Jesús c'o nc'atzin cheque, que'ito'. Tisuju' c'a qui-posada tok nc'atzin. ¹⁴Ri vinük ri nye'etzelan ivichin y nquibün chive que nitij pokonül, tic'utuj chin ri Dios que tuya' ruk'a' pa quivi', y man tic'utuj que nka-ka ru-castigo pa quivi' roma ri itzel ri nyebanun. ¹⁵Quixquicot quiq'u'in ri nyequicot, y quixok' quiq'u'in ri nye'ok' roma bis. ¹⁶Junan ivüch tibana'. Man tibün nim ivakün. Xa vit oc tibana' y man tinuc que juis etamabül c'o iviq'u'in. ¹⁷Si c'o c'a jun vinük ri c'o itzel nbün chive, man titzolij ruq'uexel chin. Chi jumul tic'uaj jun c'aslen utz, richin que man jun nilitüj chivij. ¹⁸Man tibün oyoval c'a, xa titija' ik'ij que jabel nic'uaj-ivi' quiq'u'in conojel. ¹⁹Rix ri juis quixinjo', ninbij c'a chive: Si yec'o nyebanun itzel chive, man titzolij ruq'uexel cheque. Xa tiya' pa ruk'a' ri Dios, roma ja rija' ri nyo'on rutojic ri itzel nyebanun. Cachi'el ri nbij ri Dios chupan ri tz'iban can: Pan nuk'a' yin c'o-vi ri castigo y ninya' rutojic cheque ri nquibün quimac. Quiri' nbij ri Ajaf. ²⁰Y romari' ri rutzij ri Dios ri tz'iban can, nbij: Si nnum rupan ri nretzelan avichin, rat taya' ruvay. Y si chaki'j ruchi', taya' ruya'. Si quiri' nabün, rija' xa nquix roma ri itzel rubanun. Quiri' nbij ri tz'iban can. ²¹Man tiya' k'ij que nyixch'acatüj roma ri itzel ri nban chive. Rix ja ri utz ri tibana' y jari' ri nch'acon chirij ri itzel.

13 ¹Nc'atzinej c'a que konojel nkatakej qutzij ri nquibün mandar. Roma conojel ri nquibün mandar roma ri Dios yec'o y ja rija' ri yo'on ri autoridad pa quik'a'. ²Roma si roj nkapaba-ki' chuvüch ri autoridad, c'ayuf. Roma ri autoridad ja ri Dios ye yo'on. Y si ta quiri' nkabün, kayon nkaya-ki' chupan ri castigo. ³Roma ri jun ri nbün mandar man nuya' tuj castigo pa quivi' ri vinük ri nquibün utz, xaxe pa quivi' ri vinük ri nquibanala' itzel. Tikabana' c'a ri utz, richin que man jun nkac'ulachij. Y si quiri' nkabün, utz nkujquitz'et ri nquibün mandar. ⁴Roma ja ri Dios

ri ye yo'on, richin que man jun nkac'ulachij. Pero si nkabün ri man utz tñj, tikaxbij c'a ki' chuvüch, roma ja rije' ri nyeyo'on ri castigo pa kavi'. Ye yo'on-vi roma ri Dios richin nquiya' castigo pa quivi' ri ye banuy itzel. ⁵Romari' nc'atzin que quekatakej quitzij ri nquibün mandar, roma ja ri kánima ri nbin cheke que c'uluman que nyekatakej y man xe tñj richin que man jun castigo nka-ka pa kavi'. ⁶Romari' tok nyekatoj alcaval, roma ja ri Dios yo'on quisamaj ri nquibün mandar, y ja samaj ri' ri nquibün chi jumul. ⁷Tikatojo' c'a ri kac'as cheque ri c'o kac'as quiq'uin. Tikatojo' ri alcaval tok nc'atzinej que ntojox ri alcaval. Tikatojo' ri impuestos tok nc'atzinej que ntojox ri impuestos. Ri vinük c'o quik'ij, tikaya' c'a quik'ij. Ri nimak' tak vinük tikabana' c'a cheque que ye nimak' tak vinük. ⁸Man utz tñj ri ncanaj can ri kac'as riq'uin jun chic, nixta man ta chuka' ri man nkajola' tñj ki'. Roma si nyekajo' ri ch'aka chic, xkabün yan c'a ronojel ri nbij chupan ri riley ri Dios. ⁹Ri ley ri' nbij: Rix achi'a' ri c'o ivixjaylal, man roma c'a ticanoj jun chic ixok. Y rix chuka' ixoki' ri c'o ivachijlal, man ticanoj jun chic c'a achi. Man quixcamsan c'a. Man quixelek'. Man titz'uc tzij chirij jun chic vinük. Man tirayij que ivichin ta rix ri ruchajin ri jun chic. Y c'o ch'aka chic chuka' ri nbij ri ley ri nuc'ut achique rurayibül ri Dios. Pero c'o jun chic tzij ri nutz'om ronojel re'. Y ri tzij ri' nbij: Cachi'el najo-ka-avi' rat, quiri' chuka' que'ajo' ri ch'aka chic. ¹⁰Si nyekajo' ri ch'aka chic, man itzel nkabün cheque. Y romari', si nkujo'on, xkabün yan c'a ronojel ri nbij chupan ri ley ri nuc'ut achique rurayibül ri Dios. ¹¹Y ronojel ri xinbij-ka, richin que nkuc'astñj, roma ketaman que napon yan ri k'ij tok nkucolotñj-e. C'o yan chic c'a k'ij kataken-pe, y romari' nkutiquer nkabij que vocomi más nakaj chic roj'c'o-vi chin ri k'ij tok nkucolotñj-e. ¹²Ri k'eku'n nc'o yan, y nk'alajin yan pe ri sük. Romari', si c'a c'o ri nkabün chin ri k'eku'n ri nkabanala', tikaya' can. Nc'atzinej que ja ri sük ri ntoc ri achique chok riq'uin nkato-ki'. ¹³Roj roj'c'o chic chupan ri sük y romari' c'uluman que nkac'uaj jun c'aslen utz, y man c'uluman tñj que nkuk'abür, nixta man c'uluman tñj que nyec'o quivi' ri va'in nyekabanala'. Man c'uluman tñj que ri achi'a' y ri ixoki' nquicanolaqui' richin nyemacun. Man jun c'a ruvüch itzel ri quere' c'uluman ta richin nkabün. Man c'uluman tñj que c'o oyoval chikacojol y itzel ta nkat'et jun chic roma ri utz c'o. ¹⁴Nc'atzin c'a que jun tikabana' riq'uin ri Ajaf Jesucristo, y man tikanuc nkaya' k'ij cheque ri itzel tak rayinic.

Tikatola-ki' y mani nyekabila' tzij chikij

14 ¹Ri hermanos ri ncajo' nquibün jun kiq'uin, nc'atzinej que nyekac'ul, y stape' (aunque) ri hermanos ri' man ta nquiya' cánima riq'uin ri Cristo. Pero man quekac'ul xaxe chin nkabün oyoval quiq'uin roma ri quinojibül. ²Cachi'el pari' ri ti'ij, roj kayo'on kánima que utz nkac'ux ronojel, pero hermanos ri man ta quiyo'on cánima riq'uin ri Cristo, quiyo'on cánima que xaxe ichaj ri utz nquic'ux. ³Roj ri nkac'ux

ronojel, man queketzelaj ri hermanos ri man nquic'ux tuj ronojel. Y ri hermanos ri' man tiqubij que man utz tuj ri nkabün roj roma nkac'ux ronojel. Ri Dios roj ruc'ulun konojel, si nkac'ux o man nkac'ux tuj ronojel. ⁴Romari' man jun c'a ri ntiquer nbin chirij jun hermano ri' que man utz ri nbanun. Roma ri hermano ri' rusamajel ri Ajaf chuka'. Y ja ri Ajaf ri nbin si utz o man utz tuj. Y ri hermano ri' man ntzak tuj, roma ja ri Ajaf ri nto'on richin. ⁵Yec'o hermanos nyebin que c'o k'ij ri nc'atzinej que nyechajix. Y yec'o hermanos chuka' ri nyebin que ronojel k'ij xa ye junan. Y romari' c'uluman que tikanucu' jabel chikajujunal achique nkabün. ⁶Roma ri hermanos c'o k'ij nquichajij, quiri' nquibün richin que nquiya' ruk'ij ri Dios. Y quiri' chuka' ri hermanos ri man jun k'ij nquichajij, quiri' nquibün richin nquiya' ruk'ij ri Dios. Ri hermanos ri nquic'ux ronojel, quiri' nquibün richin que nquiya' ruk'ij ri Dios. Nk'alajin que quiri' roma nquimatioxij chin ri Dios. Y quiri' chuka' nquibün ri hermanos ri man nquic'ux tuj ronojel. Quiri' nquibün richin nquiya' ruk'ij ri Dios. Y rije' chuka' nyematioxin chin ri Dios. ⁷Tok c'a c'o na ri kac'aslen chuvüch ri ruch'ulef, man utz tuj que man kayo'on tuj kánima riq'uin ri Cristo y man nkaya' tuj ruk'ij. Y quiri' chuka' tok nkucom, man utz tuj que man kayo'on tuj kánima riq'uin rija' y man nkaya' tuj ruk'ij. ⁸Tok c'a c'o na kac'aslen chuvüch ri ruch'ulef, tikaya' ruk'ij ri Cristo. Y quiri' chuka' tok nkucom, tikaya' ruk'ij. Tok c'a c'o na kac'aslen, roj richin ri Cristo. Y quiri' chuka' tok nkucom, roj richin rija'. ⁹Ri Cristo xcom y xc'astuj richin que xoc Kajaf. Jac'a rija' ri Kajaf roj ri c'a roj c'üs na y Cajaf chuka' ri ye camnük chic e. ¹⁰Romari' man c'uluman tuj que nkabij que man utz tuj ri nbanun jun hermano. Y man utz tuj chuka' que nketzelaj jun hermano. Roma konojel nc'atzinej que nkujapon chuvüch ri Cristo richin nban juzgar pa kavi'. ¹¹Cachi'el nbij chupan ri tzij ri Dios ri tz'iban can:
 Ri Ajaf nbij: Ja yin ri c'aslic Dios y ketzij vi ri ninbij,
 que conojel vinük nyexuque' chinuvüch yin, y nquibij que ketzij vi
 que ja yin ri Dios.
 Quiri' nbij ri tz'iban can. ¹²Y quiri', nkatz'et que napon vi k'ij tok chikajujunal nkajüch cuenta chin ri Dios.

Man tikabün chin jun hermano que ntzak pa mac.

¹³Romari' man tikabij chic que man utz tuj ri nbanun jun hermano. Ri nc'atzin que nkabün ja ri tikatija' kak'ij richin man nkabün chin jun hermano que ntzak o nmacun. ¹⁴Y roma yin jun nubanun riq'uin ri Ajaf Jesús, romari' vetaman que man jun ri nc'uxtuj que xajan ta chuvüch ri Dios. Pero si chuvüch jun hermano c'o ri xajan nc'uxtuj, chuvüch rija' xajan vi. ¹⁵Y romari' roj ri nkac'ux ronojel, ja ri nkajola-ki' tic'uan kichin. Man tikabün chin jun hermano ri man ronojel tuj nuc'ux que ntzak y nyojtuj ri runojibül koma roj. Roma ri Cristo xcom chuka'

roma ri hermano ri man nuc'ux tñj ronojel. ¹⁶Chikavüch roj ronojel utz, pero si yec'o ch'aka ri nyebin chikij que man utz tñj, man tikabün c'a. ¹⁷Roma roj ri rojc'o pa ruk'a' ri Dios, man jun vi nbün cheke si nkac'ux ronojel o man nkac'ux tñj. Ri nc'atzin ja ri nkac'uaj jun c'aslen choj y c'o uxlanen y quicot pa tak kánima roma c'o ri Lok'olüj Espíritu kiquin. ¹⁸Y si riq'uin ri chojmil, uxlanen y quicot pa tak k'anima nkasamajj ri Cristo, nkuka' chuvüch ri Dios y chiquivüch ri vinük chuka'. ¹⁹Romari' tikacanoj c'a achique nkabün richin que man jun tñj oyoval chikacojol y nkacukuba' ta kac'u'x chikachibil-ki'. ²⁰Man tikavulaj ri rusamaj ri Dios, roma ronojel ri nyekac'uxla'. Ketzij vi que ronojel re' utz nyec'ux, pero si c'o jun hermano ri ntzak roma nkac'ux ronojel, roj man utz tñj ri nkabün. ²¹Man tikac'ux c'a ti'ij coma ri hermanos ri man nquic'ux tñj. Man tikakum vino, ni man tikabün achique na ri nbün chin jun hermano que nrajo' nuya' can ri Dios, nmacun o ntzak. ²²Roj ketaman que chuvüch ri Dios utz nkac'ux ronojel, pero man tikabij cheque conojel que nc'atzinej que nquibün chuka' quiri'. Si utz vi ronojel ri nkabün y si ri kánima quiri' chuka' nbij, jabel kaquicot. ²³Pero si xa ca'i' kac'u'x tok nyekac'ux ronojel, nkumacun tok nyekac'ux. Roma achique na c'a ri nkabün y riq'uin ca'i' kac'u'x tok nkabün, nkumacun.

Man tikabün xaxe ri nka' chikavüch roj

15 ¹Roj ri kayo'on kánima riq'uin ri Cristo, nc'atzin que nyekacoch' ri hermanos ri man ta quiyo'on cánima riq'uin ri Cristo. Man tikabün c'a xaxe ri nka' chikavüch roj. ²Xa nc'atzin que tikabana' ri nka' chiquivüch ri ch'aka chic, ri utz nuc'ün-pe cheque rije' y nuya' más cánima. ³Ri Cristo chuka' man xbün tñj xaxe ri xka' chuvüch rija'. Coma ri ch'aka chic, hasta xuc'usaj pokonül. Cachi'el ri nbij chupan ri rutzij ri Dios ri tz'iban can: Ri vinük xcajo' que chavij ta rat requibila' itzel tak tzij, pero xa chuve yan chic yin xquibila-vi ri itzel tak tzij. Quiri' nbij ri Cristo chin ri Dios. ⁴Y ronojel ri rutzij ri Dios ri tz'iban ojer can, ye tz'iban can richin que c'o nketamaj. Nbün-vi cheke que nkucoc'h'on y nkaya' más kánima chiroyobexic ri utz ri Dios. ⁵Ri Dios nbün cheke que nkacoc'h'on y nucukuba' kac'u'x. Y ri nurayibül yin chive rix, que ri Dios nbün ta chive que junan ta ivüch. Quiri' chuka' ri xuc'ut can ri Cristo Jesús. ⁶Y quiri', chi jumul c'a junan ivüch niya' ruk'ij ri Dios ri Rutata' ri Kajaf Jesucristo.

Ri Cristo xpu'u chikato'ic konojel

⁷Y rix richin c'a chuka' niya' ruk'ij ri Dios, tibana' cachi'el ri xbün ri Cristo. Rija' xixruc'ul. Rix tic'ulu' c'a ivi' y tijo-ivi'. ⁸Quiri' ninbij chive, roma ri Cristo xpu'u richin xojruto' konojel. Xpu'u richin xojruto' roj israelitas, richin xuc'ut chikavüch que ri Dios nbün-vi ri rubin. Ja ri Cristo ri xc'amon-pe ri utz ri rubin can ri Dios cheque ri kaxquin-kamama' ojer can que nuya'. ⁹Y romari' ri man ye israelitas tñj nquiya' chuka' ruk'ij ri Dios roma ri utzilüj sipanic ri nspaj-pe rija'. Cachi'el ri nbij chupan ri rutzij ri Dios ri tz'iban can:

Ye vachibilan ri vinük ri man ye israelitas tuj ninya' ak'ij,
y ninbixaj ri abi'.

Quiri' ri tz'iban can.

¹⁰Y ri rutzij ri Dios nbij chuka':

Rix ri man rix israelitas tuj, quixquicot quiquin ri israelitas, ri
rutinamit ri Dios.

Quiri' nbij chupan ri tz'iban can.

¹¹Y chuka' nbij:

Tiya' ruk'ij ri Ajaf chi'ivonojel rix ri man rix israelitas tuj.

Conojel vinük tiquiya' c'a ruk'ij ri Dios.

Quiri' nbij chupan ri tz'iban can.

¹²Y ri Isaías rutz'iban can chupan ri vuj que pari' ri Cristo ntzijon-vi que nbij:

C'o jun ruxquin-rumam can ri achi Isaí nc'uje'

y ntoc ri Jun ri nbün mandar pa quivi' ri vinük ri man ye israelitas tuj,
y ri vinük ri' ncoyobej-vi c'a que rije' nquil-vi ri utz ri c'o riq'uin ri

Jun ri nbün mandar.

Quiri' ri rutz'iban can ri Isaías.

¹³Ri Dios nbün cheke que yo'on-apu kánima riq'uin. Y ri nurayibül yin
chive rix, que ri Dios nunojsaj ta ri ivánima riq'uin ronojel quicot y uxlanen.
Quiri' nbün chive si itaken rija'. Nyixruto' riq'uin ri ruchuk'a' ri Lok'olüj
Espíritu, richin que yo'on ivánima nivoyobej ri utziluj rusipanic ri Dios.

¹⁴Hermanos, vetaman que utz vi ri ic'aslen. Vetaman chuka' que rix juis
q'uiy achique ivetaman y romari' tok nyixtiquer niya' ivánima iviq'uin
chi'ivachibil ivi'. ¹⁵Pero c'o c'a ch'aka tijonic ri nc'atzin que xinc'uxla'aj
chive, y man xinpokonaj tuj xintz'ibaj ri tijonic re' chupan ri vuj re'.
Xintz'ibaj ri tijonic re' chive, roma ri Dios ruyo'on chuve ri utzilüj sipanic
ri nspaj-pe rija', ¹⁶y rubanun chuve que xinoc rusamajel ri Jesucristo
richin nintzijoj cheque ri vinük ri man ye israelitas tuj, ri utzilüj rutzij
ri Dios ri nc'amon-pe colonic. Y quiri' rije' nquijüch ri quic'aslen chin
ri Dios roma ri nusamaj yin. Nyeka-vi chuvüch ri Dios, roma ri Lok'olüj
Espíritu nuch'ajch'ojrisaj ri quic'aslen.

¹⁷Ri Jesús c'o viq'uin, y romari' yin jabel nquiquicot riq'uin ri samaj ri yo'on
chuve roma ri Dios. ¹⁸Yin man ta nquitiquer nquich'o, si man ta ja ri nusamaj
ri nintzijoj chive. Y richin nubanun ri samaj re', ja ri Cristo ri ucusayon vichin.
Y romari' ye q'uiy cheque ri vinük ri man ye israelitas tuj ri nyetaken richin.
Nquitakej roma nac'axaj ri utzilüj tzij richin colonic ri nintzijoj cheque
y roma chuka' nquitz'et ri nquibanun. ¹⁹Y xequitz'et chuka' ri milagros ri
xenbün. Ri Lok'olüj Espiritu nuya-vi uchuk'a' chuve richin nyenbün nimak' tak
milagros richin que nuc'ut que ketzij ja ri rutzij ri Dios ri nintzijoj. Yin xintzijoj
ri utzilüj tzij richin colonic pa tinamit Jerusalén y pa ch'aka chic tinamit, y
chuka' c'a pa ruch'ulef Ilírico. Ronojel c'a ri lugar re' xintaluj yan rubixic ri
utzilüj rutzij ri Cristo ri nc'amon-pe colonic. ²⁰Quere' ninbün roma juis ninjo'

nink'alajrisaj ri utzilüj rutzijol pa tak lugar ri man etaman tuj que nc'atzin que ntakex ri Cristo, y man ja tuj ri ape' xa tz'amon chic rutzijosic coma ch'aka chic vinük. ²¹Y tok quere' ninbün, nbanatuj c'a ri nbj chupan ri rutzij ri Dios:

Que ri vinük ri man jun cac'axan tuj pari' ri Cristo, ncac'axaj c'a.

Ri man jun tzijon cheque pari' rija', nk'ax cheque.

Quiri' nbj chupan ri tz'iban can.

Ri Pablo nrajo' nbe chiquitz'etic ri hermanos ri yec'o pa tinamit Roma

²²Y roma juis ninjo' nintzijo' ri rutzij ri Dios cheque ri man cac'axan tuj, romari' man yin nubanun tuj yin apon iviq'uin rix. ²³⁻²⁴Jac'a vocomi xinq'uis yan ri nusamaj pa tak tinamit ri xinbij yan ka chive. Y riq'uin ba' nquinapon iviq'uin, roma q'uiy yan juna' nquijo'on que nquinapon ta iviq'uin. Nunucun que nquic'o iviq'uin tok nquibe pa ruch'ulef España. Ninjo' nquic'uje' jun ca'i-oxi' k'ij iviq'uin, richin que rix niya' quicot pa vánima. Y chuka' ninjo' que niya' ta chuve ri nc'atzin richin ri nubey.

²⁵Pero vocomi nquibe pa tinamit Jerusalén richin nyenjacha' jun sipanic cheque ri nquitakej-vi ri Jesús ri yec'o chiri'. ²⁶Roma ri nquitakej-vi ri Jesús ri man ye israelitas tuj ri yec'o chere' pa ruch'ulef Macedonia y pa ruch'ulef Acaya, xalüx pa cánima que nquiya' jun sipanic cheque ri hermanos israelitas ri yec'o pa tinamit Jerusalén, ri c'o nc'atzin cheque. ²⁷Ncajo' nyequito'. Y jabel c'uluman que nquibün quiri', roma nkutiquer nkabij que c'o quic'as quiq'uin ri israelitas. Roma ja ri israelitas ri xetzijon ri rutzij ri Dios cheque, y romari' c'uluman que rije' nyequito' ba' ri israelitas chuka'. ²⁸Y tok nujachon chic c'a can ri sipanic ri', nquibe pa ruch'ulef España y jari' tok nquic'o iviq'uin rix. ²⁹Y vetaman que tok nquinapon iviq'uin, nim vi ri utz ri nic'ul roma ri utzilüj rutzij ri Cristo ri ninc'ua'j chive.

³⁰Hermanos, ja ri Jesucristo ri Kajaf, y ri Lok'olüj Espíritu ruyo'on que nyekajo-ki' konojel. Romari' ninc'utuj favor chive que riq'uin ronojel ivánima nibün ta orar voma. Yin ninc'utuj favor chin ri Dios. Y quiri' ninjo' que nic'utuj ta chuka' rix, ³¹que man ta nquitzak ta pa quik'a' ri vinük ri man quitaken tuj ri Jesucristo chiri' pa ruch'ulef Judea. Y chuka' nic'utuj ta chin ri Dios que ri hermanos ri nyetaken-vi ri Jesús pa tinamit Jerusalén chila' pa ruch'ulef Judea, jabel ta ruc'ulic nquibün chin ri sipanic ri ninjüch cheque. ³²Y quiri', nquicot ta ri vánima tok nquinapon iviq'uin si quiri' ri rurayibül ri Dios, y nquinuxlan ta e ba' iviq'uin. ³³Ri Dios nuya' uxlanan pa tak kánima. Y ri nurayibül yin chive rix, que ri Dios nc'uje' ta iviq'uin chi'ivonojel. Quiri' ta c'a.

Ri Pablo nbün saludar cheque ri hermanos.

16 ¹Y ninchilabej c'a e chive ri hermana Febe, roma rija' jun ixok rusamajel ri Dios chiquicojol ri hermanos ri nquimol-qui' pa rubi' ri Dios pa tinamit Cencrea. ²Romari' tic'ulu' jabel. Quiri' c'uluman

que nibün rix ri nyixtakej-vi ri Jesús, cheque ri ye jun chuka' quibanun riq'uin ri Ajaf. Ninjo' que nito' ta ri hermana Febe riq'uin ri nc'atzin chin. Roma rija' ye ruto'on ye q'uiy y quiri' chuka' rubanun viq'uin yin.

³Tibana' saludar ri hermanos Priscila y Aquila, ri junan xojsamüj quiq'uin pa rusamaj ri Jesucristo. ⁴Rije' jubama xecom chinucolic yin, y yin juis ninmatioxij cheque. Y quiri' chuka' conojel ri molaj hermanos ri man ye israelitas tñj, nquimatioxij chuka' cheque roma ri xquibün voma yin. ⁵Y tibana' chuka' saludar ri hermanos ri nquimol-qui' pa cacho ri ca'i' hermanos ri'. Y quiri' chuka' tibana' saludar ri hermano Epeneto. Juis ninjo' rija', y ja rija' ri nabey xutaken richin ri Cristo pa ruch'ulef Acaya. ⁶Tibana' saludar ri hermana María. Rija' juis nsamüj chi'icojol. ⁷Tibana' chuka' saludar ri hermanos Andrónico y Junias, ri ye nuvinak vi, y junan xoje'uje' quiq'uin pa cárcel. Q'uiy yan chic juna' tiquitakej ri Cristo. Rije' nabey quitaken chic tok yin man jani rutzijol ninnimaj. Y rije' jabel vi chuka' ye tz'eton coma ri ch'aka chic apóstoles.

⁸Tibana' saludar ri hermano Amplias. Juis ninjo' roma rija' chuka' rutaken ri Ajaf. ⁹Tibana' saludar ri hermano Urbano. Riq'uin rija' junan xojsamüj pa rusamaj ri Jesucristo. Y tibana' chuka' saludar ri hermano Stachis, ri juis ninjo'. ¹⁰Tibana' saludar ri hermano Apeles. Rija' nk'alajin que ruyo'on ránima riq'uin ri Cristo. Tibana' saludar ri hermanos ri aj pa racho ri Aristóbulo. ¹¹Tibana' saludar ri hermano Herodión, ri nuvinak vi. Tibana' saludar ri aj pa racho ri Narciso, ri ye jun quibanun riq'uin ri Ajaf. ¹²Tibana' saludar ri hermanos Trifena y Trifosa, ri ye rusamajela' ri Ajaf. Tibana' saludar ri hermano Pérsida, ri juis ninjo'. Rija' juis samajniük pa rusamaj ri Ajaf. ¹³Tibana' saludar ri hermano Rufo. Rija' chuka' cha'on roma ri Ajaf. Y tibana' chuka' saludar ri rute' rija', ri cachi'el chuka' nte' yin. ¹⁴Tibana' saludar ri hermanos Asíncrito, Flegonte, Hermas, Patrobas, Hermes y ri hermanos ri yec'o quiq'uin. ¹⁵Tibana' saludar ri hermanos Filólogo, Julia, ri Nereo y ri rana', ri Olimpás y ri quitaken-vi ri Jesús ri yec'o quiq'uin.

¹⁶Y chuka' ninbij chive que tibana' saludar c'a ivi' chi'ivonojel riq'uin ronojel ivánima tijola-ivi'. Y tic'ulu' c'a ri saludos ri nyequitük-e conojel ri hermanos ri nquimol-qui' pa rubi' ri Cristo pa tak tinamit ri yec'o chiri'.

¹⁷Hermanos, yin ninchilabej c'a chive que tichajij-ivi', roma yec'o vinük ri xa nyequijachala' ri hermanos, y nquibün cheque que nyetzak, roma jun vi chic tijonic ri quic'uan y juis nyech'o chirij ri ketzij tijonic ri ic'uan rix. Ri vinük ri nyebanun quiri' man que'itzeklebej, xa tijachala-ivi' quiq'uin. ¹⁸Roma rije' man ja tñj ri rusamaj ri Kajaf Jesucristo ri nquibün, xa ja ri ncajo' rije' ri nquibün. Rije' jabel tak tzij c'a ri nyequibila' y romari' juis utz ncac'axaj ri hermanos ri man nyenucun tñj jabel pari', y chanin nyech'acatij-e pa quik'a'.

¹⁹Jac'a rix, conojel quetaman chic que nitakej-vi rutzij ri Dios, y yin juis nquicot ri vánima romari'. Pero chuka' ninjo' que tivetamaj nc'uje' ina'oj chubanic ri utz y man chubanic tñj ri itzel. ²⁰Ja ri Dios nyo'on uxlanan pa tak kánima. Y rija' nbün yan chive que nyixch'acon chirij ri itzel-vinük. Ri utzilij sipanic ri nspaj-pe ri Kajaf Jesucristo nc'uje' ta c'a iviq'uin.

²¹Ri hermano Timoteo nutük-e saludos chive. Kachibilan-ki' pa rusamaj ri Dios. Nquitük-e chuka' saludos cheque ri hermanos Lucio, ri Jasón y ri Sosípater. Rije' ye nuvinak vi.

²²Y yin Tercio, ri nqitz'iban-e ri rutzij ri hermanos Pablo, nyixinbün saludar. Yin, jun chuka' nubanun riq'uin ri Ajaf.

²³Ri hermano Gaio nyixrubün saludar. Vocomi ja pa racho rija' c'o-vi nu-posada, y chere' chuka' nyepu'u-vi conojel hermanos. Ri hermano Erasto nutük-e saludos chive. Ja rija' ri tesorero chupan ri tinamit re'. Y quiri' chuka' nutük-e saludos chive ri hermano Cuarto.

²⁴Ri utzilüj sipanic ri nspaj-pe ri Kajaf Jesucristo xtic'uje' ta c'a iviq'uin chi'ivonojel. Quiri' ta c'a.

Konojel tikaya' ruk'ij ri Dios

²⁵Tiya' c'a ruk'ij ri Dios. Roma xaxe rija' ri ntiquer nbanun chive que más niya' ivánima riq'uin. Quiri' nbij ri utzilüj tzij richin colonic, ri rutzij ri Jesucristo ri nintzijoje yin. Ri tzij re' man katz k'alajrisan tütj pe utz roma ri Dios, xa c'a ja ri tiempo re' xuk'alajrisaj jabel. ²⁶Vocomi xk'alajrisüs yan c'a, y romari' tok nk'ax cheke ri ye tz'iban can coma ri achi'a' k'alajrisüy rutzij ri Dios ri xec'uje' ojer can. Ri Dios ri c'o richin chi jumul, rubin can que titzijos cheque conojel vinük, y jari' ri ntajin vocomi, richin que tiquiya' cánima riq'uin rija' y tiquitakej ri rutzij.

²⁷Xaxe jun Dios c'o y riq'uin rija' c'o-vi ronojel etamabül. Tikaya' c'a ruk'ij rija' richin jumul. Xaxe roma ri Jesucristo nkutiquer nkaya' ruk'ij ri Dios. Quiri' c'a.